

শ্রী-সপ্ত

শ্রীসীতা দেবী

সিটি বুক সোসাইটি  
৬৪নং কলেজ ষ্ট্রীট, কলিকাতা

আশ্বিন, ১৩৪১ ]

[ মূল্য ১ টাকা

প্রকাশক :—  
শ্রীকেশবচন্দ্র চৌধুরী.  
৬৪ কলেজ স্ট্রীট,  
কলিকাতা ।

# সূচীপত্র

১।	অরণ্য-ভৈরব (সচিত্র) ...	...	১
২।	অতি লোভ (সচিত্র) ...	...	২৩
৩।	কুঁড়ে শামুক (সচিত্র) ...	...	৩৫
৪।	পেটুক ভজু (সচিত্র) ...	...	৫০
৫।	নীলাম্বরী (সচিত্র) ...	...	৭৩
৬।	চীনে বুদ্ধি (সচিত্র) ...	...	৯৬
৭।	মাটির মায়া (সচিত্র) ...	...	১১৫



# কথা-সাপ্তক

## অরণ্য-ভৈরব

বহুকাল আগে এক পাহাড়-ঘেরা দুর্গে এক কৃত্রিয় সামন্তরাজ বাস করতেন, তাঁর নাম মল্লদেব। তাঁর যে দেশ, সেখানে বাইরের থেকে প্রবেশ করা দুঃসাধ্য ব্যাপার ছিল, বাইরের শত্রু শত-সহস্রবার হানা দিয়েও সেই কৃষ্ণকায় ভীষণ দানবের মত পাহাড়কে জয় ক'রে ভিতরে আসতে পারেনি। মল্লদেব নামেই সামন্তরাজ ছিলেন, সম্রাটের চেয়ে তাঁর প্রতাপ বেশী বই কম ছিল না। তাঁর শাসনাধীনে বাস করত যারা, তারা কোনওদিন কোনও বিষয়ে তাঁকে অতিক্রম করতে সাহস করত না। তাই ব'লে তিনি যে অত্যাচারী রাজা ছিলেন, তা নয়। তাঁর বিরুদ্ধা-

## কথা সপ্তক

চরণ করলে তিনি হিংস্র পশুর মত ভয়ানক হয়ে উঠতেন বটে, কিন্তু তাঁকে মেনে চললে তিনি প্রজার মঙ্গলের জন্যে প্রাণ দিতেও কাতর হতেন না। পিতা যেমন যত্নে নিজের সন্তানকে রক্ষা করেন, সেই ভাবেই তিনি দেশের অধিবাসীদের রক্ষা করতেন।

তাঁর রাণী বিজয়াও ছিলেন তাঁর উপযুক্ত স্ত্রী। ক্ষত্রিয়ের মেয়ের যেমন হতে হয়, তিনি ঠিক তেমনিই ছিলেন। তাঁর মনে ভয়ের লেশও ছিল না, কিন্তু হৃদয়ে স্নেহেরও অভাব ছিল না। যুদ্ধে বিগ্রহে স্বামীর পাশে ঘোড়ায় চড়ে রণক্ষেত্রেও তাঁকে দেখা যেত, আবার দুঃখী-দরিদ্রের ঘরে মূর্তিমতী করুণার মত, অন্নপূর্ণার মতও তাঁকে দেখা যেত।

এক দুঃখ ছিল এঁদের। প্রকাণ্ড প্রাসাদ লোকজনে গম্গম্ করত, কিন্তু তার ভিতর শিশুর কাকলি কোনওদিন শোনা যেত না। বিজয়ার চোখে হাজার আলোর আলোকিত ঘরগুলো অঁধার ঠেকত, তাঁর মন ছট্‌ফট্ করত—তাঁর দীনতম

প্রজার কুড়ে ঘরে পালিয়ে যাবার জন্যে, তাদের  
খুলোকাদা-মাথা খোকাখুকিগুলোকে নিয়ে খেলা  
করবার জন্যে। মননলাভের আশায় তিনি কত  
ব্রত, কত উপবাস বেঁধে রাখতেন, কত তীর্থ-ভ্রমণ,  
কত দানধ্যান যে করতেন তার আর গোণা-  
গুণতি ছিল না।

মল্লদেবের রাজ্যের চারিদিকে বিবিড় বন, তার  
ভিতর ছিল এক দেবমন্দির। কতকালের পুরানো  
যে তা কেউ বলতে পারে না। আগে নাকি সে  
জায়গায় গ্রাম ছিল, কি একটা মহামারী হয়ে  
গ্রামের বেশীর ভাগ লোক মারা গেল, যাঁরা  
বেঁচে ছিল, তারা প্রাণের ভয়ে পালিয়ে দূরে  
গিয়ে ঘর বাঁধল। কেবল দেবমন্দিরের পুরোহিত  
পালালেন না। দেবতা মৃত্যুভয়ের অতীত, তাঁর  
পূজারীরও ভয় পাওয়া সাজে না। তাই সেই  
গহন বনের ভিতর একলা রইলেন প'ড়ে পাষণময়  
বিগ্রহ আর তাঁর সেবক বৃদ্ধ ব্রাহ্মণ। গ্রামবাসীরা  
প্রথম প্রথম পূজা-পার্বণ উপলক্ষ্যে মন্দিরে আসত,  
ক্রমে তাও ছেড়ে দিল। চারিদিকের বন গহন

## মা-সপ্তক

থেকে গহনতর হতে লাগল, হিংস্র জন্তুতে ভরে উঠল। পূজারী ব্রাহ্মণ কবে যে মারা গেলেন, তাঁর স্থান কে কি ভাবে পূর্ণ করল, সে খোঁজ নিতে কারও ভরসা হল না। বহুযুগ কেটে গিয়েছে, তবু এখনও কিন্তু সন্ধ্যায় আরতির ঘণ্টাধ্বনি গভীর বনের বক্ষভেদ করে মানুষের কানে এসে পৌঁছায়।

পূর্ণিমার তিথি। সকাল থেকে রাণী বিজয়া স্নান করে পট্টবস্ত্র পরে, রাজ্যের যত দীন-দুঃখীকে ভিক্ষা বিতরণ করছেন। প্রতি পূর্ণিমাতেই তিনি এরকম করেন। এই আশায় করেন যে এতে যদি দেবতা তুষ্ট হয়ে তাঁর কোলে একটি শিশু পাঠিয়ে দেন। সব ভিখারীরা চলে গেল, বসে রইল এক অন্ধ বৃদ্ধ। রাণী তাকে জিগ্গেস করলেন, “তুমি কি আর কিছু চাও?”

সে বললে, “কিছু না মা। কাল রাত্রে স্বপ্নে দেখেছি, আপনি আর আমাদের মহারাজ যেন অরণ্য-ভৈরবের পূজা দিতে চলে গেলেন। ফিরে যখন এলেন, আপনার কোলে রাজপুত্র!” বলে বুড়ো উঠে চলে গেল।





.....বসে রইল এক অন্ধ বৃদ্ধ । রাণী তাকে জিগ্গেস করলেন,  
“তুমি কি আর কিছু চাও ?”



## অরণ্য-ভৈরব

রাণী বিজয়া অনেকক্ষণ নীরবে দাঁড়িয়ে রইলেন। অন্ধ বৃদ্ধ এ কি বলল গেল! এ কি শুধুই স্বপ্ন, না এর ভিতর সত্যও কিছু আছে? হবেও বা। হয়ত তার বাইরের দৃষ্টি হারিয়ে অন্তরের দিব্য-দৃষ্টি লাভ হয়েছে। অন্য মানুষের কাছে যা অজ্ঞেয়, সে হয়ত তা জানতে পারে।

কিন্তু অরণ্য-ভৈরবের মন্দিরে যাওয়া, সে ত সহজ ব্যাপার নয়! মন্দিরের কাছে গিয়ে প্রাণ নিয়ে ফিরে এসেছে—এমন ত কোনও মানুষ রাণী দেখেননি। তবু তাঁকে যেতে হবে। মহারাজ সঙ্গে থাকলে বিজয়ার সাক্ষাৎ যমপুরীতে যেতেও ভয় নেই।

মল্লদেব যখন অন্তঃপুরে এলেন, তখন বিজয়া তাঁকে সব কথা বললেন। তিনি কিছুক্ষণ চুপ ক'রে থেকে বললেন, “সে যে বড় ভয়ানক পথ, তুমি পারবে যেতে?”

বিজয়া বললেন, “তুমি সঙ্গে থাকলে পারব।”

সেই দিন থেকে অরণ্য-ভৈরবের মন্দিরে যাত্রার আয়োজন চলতে লাগল। আয়োজন কিছু নিয়ে

## কথা-সংকল

যাবার জন্মে নয়, যা রেখে যাচ্ছেন—তার সুব্যবস্থার জন্মে। যদিই তাঁরা না করেন, বলা ত যায় না? যাবেন তাঁরা তীর্থ-যাত্রীর মত, রাজ-ঐশ্বৰ্য্যের ঘটা কিছু তার ভিতর থাকবে না।

দিন দশ-বারোর ভিতর তাঁদের সব কাজ চুকে গেল, তাঁরা বেরিয়ে পড়লেন। সঙ্গে তৃতীয় ব্যক্তি কেউ রইল না। রাজা পরলেন সাধারণ সৈনিকের বেশ, কারণ সশস্ত্র হয়ে যেতে হবে। রাণী চললেন সাধারণ গৃহস্থ-বধুর বেশে, হাতে একগাছি কঁরে সোনার কঙ্কণ ছাড়া আর কোন গহনাও তাঁর রইল না!

রাজ্যের অর্ধেক লোক রাজারানীকে বিদায় দেবার জন্মে বনের গোড়া পর্য্যন্ত এগিয়ে এল। রাজারানী যখন সেই অন্ধকার বনের ভিতর অদৃশ্য হয়ে গেলেন, তখন তারা কাঁদতে কাঁদতে বাড়ী ফিরে গেল।

সে কি ভীষণ বন! এ রকম জায়গা রাজা বা রাণী স্বপ্নেও কোনওদিন দেখেননি। বনের ভিতরকার আঁধার এমন গভীর, যে মনে হয়

সৃষ্টির গোড়া থেকে সূর্যের আলোর একটি রেখাও কখনও এখানে প্রবেশ করেনি। সেখানকার নিস্তব্ধতা এমন অটুট, এমন ভয়াবহ, যে মনে হয় বাইরের জগতের হাওয়াও যেন এর মধ্যে ঢুকে গাছের পাতাটিতে নাড়া দিতে ভয় পায়। এই ভীষণ বনের ভিতর দিয়ে, পিছন দিকে একবারও না তাকিয়ে, রাজা আর রাণী দ্রুতপদে অগ্রসর হয়ে চললেন।

বনের ভিতর পথের কোনও চিহ্ন নেই। অরণ্য-ভৈরবের মন্দির কতদূরে কে জানে! কতখানি যে বেলা হল, তাও বুঝবার কোনও উপায় নেই। ক্ষুধা-তৃষ্ণায় নিতান্ত কাতর হয়ে, মল্লদেব আর বিজয়া একটা গাছের তলায় বসে বিশ্রাম করতে লাগলেন।

সামান্য কিছু খেয়ে ক্ষুধা-নিবৃত্তি করে ও বিশ্রামে একটু স্থস্থ হয়ে, তাঁরা আবার চলতে আরম্ভ করলেন। ক্রমে সন্ধ্যা হয়ে আসছে, বনের ভিতরের অঁধার গাঢ় হয়ে উঠছে, এতক্ষণের নীরবতা ভেঙে গিয়ে চারিদিকে কিসের যেন একটা

## কথা-সংকলন

সাদা জেগে উঠছে। রাজা বললেন “এইবার সাবধান।”

কিন্তু এই ভীষণ অন্ধকারে বেশীক্ষণ আর চলা গেল না। রাজারাগী আবার গাছের তলায় আশ্রয় নিলেন। চারিদিকে অগ্নিকুণ্ড জ্বলে বসে নিদ্রাহীন চক্ষে রাত্রি কাটিয়ে দিলেন। বিজয়া দু-একবার তুলে পড়লেন। কিন্তু মল্লদেবের চোখে এক নিমেষের জন্যও পলক পড়ল না।

ক্রমে আঁধার তরল হয়ে আসতে লাগল, তাঁরা বুঝলেন ভোর হচ্ছে। আগুন নিভিয়ে দিয়ে আবার এগিয়ে চললেন।

দ্বিতীয় দিনও প্রথম দিনের মত কেটে গেল। সন্ধ্যার সময় মনে হল, অনেক দূরে কোথায় যেন আলোর রেখা দেখা যাচ্ছে, ঘণ্টাধ্বনি যেন ভেসে আসছে; রাণী বিজয়ার মুখে আনন্দের হাসি ফুটে উঠল। তিনি বললেন “ঐ বোধহয় অরণ্য-ভৈরবের মন্দির।”

রাজা বললেন, “তাই হবে, ভৈরবের বিশেষ কৃপায় আমরা এতদূর নিরাপদে এসেছি, নইলে

কোনও মানুষ এখান থেকে প্রাণ নিয়ে ফিরে যায় বলে শুনি নি।”

কিন্তু রাত্রির অন্ধকার তাঁদের বাধা দিল। আগের রাত্রির মত আজও তাঁদের জেগে বসে থাকতে হল। চারিদিকে আগুন জ্বলছে, যাতে কোনও বন্যজন্তু অতর্কিতে তাঁদের আক্রমণ না করতে পারে। কারা যেন সারি সারি হেঁটে চলেছে, তাদের কথার গুঞ্জন, মেয়েদের অলঙ্কারের শিঞ্জন, সব শোনা যাচ্ছে, খালি চোখে তাদের দেখা যায় না। আস্তে আস্তে তাদের পায়ের শব্দ মিলিয়ে গেল। আবার কারা আসছে? তাদের পায়ের শব্দে পৃথিবী কেঁপে উঠছে, তাদের অস্ত্রের ঝনঝন, ঘোড়ার হ্রেষাধ্বনি, গভীর অরণ্যকে সজাগ করে তুলেছে। কোথায় যাচ্ছে এরা, কোন্ দিগ্বিজয়ে? দেখতে দেখতে তাদের পায়ের শব্দও মিলিয়ে গেল, বন আবার নীরব নিঝুম।

ক্রমে অন্ধকার কেটে গেল, পূর্বদিগন্তের বন্ধভেদ করে সূর্য্যদেব আলোর প্লাবন ছুটিয়ে দিলেন। মল্লদেব আর বিজয়া উঠে পড়লেন।

## কথা-সংকলন

ঐ ত দেখা যায় অরণ্য-ভৈরবের মন্দিরের চূড়া ।  
আশায় তাঁদের হৃদয় ভ'রে উঠল, তাঁরা  
মহোৎসাহে এগিয়ে চললেন ।

ভৈরবের মন্দির দাঁড়িয়ে আছে কত শতাব্দীর  
ঝড় ঝড়িকে অগ্রাহ্য করে তার ঠিক-ঠিকানা নেই ।  
তার কাল পাথরের দেওয়ালে কোথাও ফাট ধরেনি,  
কোথাও আগাছা জন্মায়নি । মন্দিরের চূড়ার  
উপর যে ত্রিশূল বসান, তার ইম্পাত এখনও  
ঝক্ঝক্ করছে । মন্দিরের বিশাল জোড়া-কপাট  
বন্ধ । রাজা ডেকে বললেন, “কে আছ, দরজা  
খোলো, আমরা তীর্থ-যাত্রী, পথশ্রমে বড় কাতর ।”

প্রথমে কোনো সাড়া-শব্দ পাওয়া গেল না ।  
তারপর কে যে কপাট খুলল, তা তাঁরা দেখতে  
পেলেন না, কিন্তু দরজা আস্তে আস্তে দুর্কাক হয়ে  
তাঁদের ভিতরে যাবার পথ ক'রে দিল । মল্লদেব  
আর বিজয়া ভিতরে ঢুকলেন ।

দেবতার চরণে উৎসর্গ করবার জন্যে তাঁরা  
কোনও অর্ঘ্য নিয়ে আসেননি, কিন্তু এমনি কি ক'রে  
প্রণাম করবেন ? মল্লদেব কোমরবন্ধ থেকে তাঁর



ইস্পাতের ছোরাখানি খুলে দেবতার চরণে রেখে  
প্রণাম করলেন, রাণী হাতের একমাত্র অলঙ্কার  
সোনার কঙ্কণ খুলে দিলেন ।

পূজা শেষ ক'রে তাঁরা মন্দিরের ভিতর থেকে  
বেরিয়ে এসে, বাইরের দালানে বিশ্রাম করতে  
লাগলেন । বিজয়া অত্যন্ত ক্লান্ত হয়েছিলেন,  
তিনি সেই শান-বাঁধান মেঝের উপরেই ঘুমিয়ে  
পড়লেন । মল্লদেব খানিকক্ষণ জেগে থাকবার চেষ্টা  
করলেন কিন্তু দুই রাত না ঘুমিয়ে তিনিও অত্যন্ত  
কাতর হয়েছিলেন, দেখতে দেখতে নিজের অজ্ঞাতে  
কোন এক সময় তিনিও ঘুমিয়ে পড়লেন ।

একই সময়ে হঠাৎ কি ক'রে তাঁদের ঘুম ভেঙে  
গেল । চেয়ে দেখলেন, সূর্যাস্তের সময় হয়ে  
এসেছে, বনের ভিতর ছায়া গভীর হয়ে আসছে ।  
রাজা ব'লে উঠলেন, “কি আশ্চর্য্য, আমরা এতক্ষণ  
ঘুমিয়েছি ?”

রাণী বললেন, “আমি কি সুন্দর স্বপ্ন দেখলাম ।”

রাজা বললেন, “স্বপ্ন ত আমিও দেখেছি, কিন্তু  
তুমি কি দেখেছ, আগে বল ।”

বিজয়া বললেন, “আমি দেখলাম, দেবী পার্বতী আমার মাথার কাছে দাঁড়িয়ে বলছেন, ‘দেবমূর্তির পায়ের কাছে তাঁর প্রসাদী ফল পাবে, তাই নিয়ে যাও। শুকনো ফল যেদিন আবার সরস, সতেজ রূপ ধরবে, সেদিন সেটিকে খেও, তোমার মনস্কামনা পূর্ণ হবে।’”

মল্লদেব বললেন, “কি আশ্চর্য্য, আমিও ঠিক ঐ স্বপ্নই দেখেছি। শুধু আমার মাথার কাছে যিনি দাঁড়িয়েছিলেন, তিনি পার্বতী নন, একজন সন্ন্যাসী। চল মন্দিরের ভিতরে গিয়ে দেখা যাক, স্বপ্নের ভিতর সত্য কিছু আছে কিনা।”

দু’জনে আস্তে আস্তে মন্দিরের মধ্যে গিয়ে ঢুকলেন। সত্যিই ত, দুটি ফল প’ড়ে রয়েছে, দেবমূর্তির পায়ের কাছে। বিজয়া তাড়াতাড়ি সে দুটি তুলে নিলেন অঁচলে ক’রে।

আবার তাঁরা বাইরে বেরিয়ে এলেন। রাজা বললেন, “আজ রাত যেমন করে হোক এখানে কাটাতে হবে। খাওয়া-দাওয়ার কি ব্যবস্থা করা যায় ?”

## অরণ্য-ভৈরব

রাণী বললেন, “দুদিন এক-রকম না খেয়েই কেটেছে, আজও না-হয় তাই কাটবে। অরণ্য-ভৈরবের প্রসাদী ফল দুটি এখন ত খাবার জো নেই, নইলে তাই দিয়েই আজ আমরা ক্ষুধা-নিবৃত্তি কর্তাম।”

রাজা বললেন, “কবে যে শুকনো ফল আবার টাটকা হয়ে উঠবে, তা ত কিছু বোঝা গেল না। আরও কতদিন অপেক্ষা করতে হবে কে জানে?”

রাণী বললেন, “দেখাই যাক, এতটা করুণা যখন দেবতা আমাদের উপরে করেছেন, তখন অল্পের জন্যে অসহিষ্ণু হওয়া উচিত নয়। হয়ত আজ রাতে স্বপ্নে আবার আমরা তাঁর অদেশ পাব।”

রাজা রাণী মন্দিরের দালান থেকে নেমে চারিদিক ঘুরে দেখতে গেলেন, কোথাও ফল কি জল কিছু পাওয়া যায় কিনা।

আশ্চর্যের বিষয়, কয়েক পা যেতে না যেতেই তাঁরা সুন্দর একটি ঝরণা দেখতে পেলেন। অথচ কাল এই পথে মন্দিরে আসবার সময় এটি

## কথা-সংকল

মোটাই তাঁদের চোখে পড়েনি। শুধু ঝরণা নয়, তার আশে পাশে গাছে কি চমৎকার গুচ্ছ গুচ্ছ পাকা ফল ঝুলছে। রাজারাণীর মুখে আর কথা ফুটল না। নীরবে দেবতার উদ্দেশে প্রণাম জানিয়ে তাঁরা ক্ষুধা-তৃষ্ণার নিরন্তর ক'রে মন্দিরে ফিরে এলেন। দেখতে দেখতে রাত্রির অঁচলের তলায় সমস্ত বন আড়াল হয়ে গেল। রাজা রাণী মন্দিরের ভিতরে ঢুকে, সকাল হবার আশায় ব'সে রইলেন।

খানিক ব'সে থাকার পর, এ রাত্রেও তাঁরা ঘুমিয়ে পড়লেন। স্বপ্ন দেখলেন আবার, দেবতা সন্ন্যাসীর রূপ ধ'রে বলছেন, 'যেদিন তোমরা সব' চেয়ে বড় স্বার্থ ত্যাগ করবে, সেইদিন গুকনো ফল তাজা হয়ে উঠবে।'

পরদিন সকালে উঠে, পূজা শেষ ক'রে মল্লদেব আর বিজয়া নিজেদের রাজ্যে ফিরে চললেন। মন্দিরের পথে তাঁদের প্রাণ যে-রকম ভয় আর নিরাশায় পূর্ণ ছিল, এখন তেমনই আশায় আর আনন্দে ভ'রে উঠল। শীঘ্রই যে তাঁদের মনো-

বাঞ্ছা পূর্ণ হবে, এ বিষয়ে তাঁদের আর কোনও সন্দেহ রইল না।

রাজ্যরাণী দেশে ফিরতেই ঘরে ঘরে উৎসব শুরু হয়ে গেল। প্রজারা একেবারে শোকে নিরাশায় অবসন্ন হয়ে পড়েছিল, মল্লদেব আর বিজয়াকে ফিরে পাবার আশা আর তাদের ছিল না। এখন রাজপ্রাসাদেও মহোৎসবের স্রোত বইতে লাগল। দান-ধ্যান, কাঙ্গালীভোজন—নিত্যনৈমিত্তিক ব্যাপার হয়ে উঠল। পূর্বপুরুষের সঞ্চিত ধন মল্লদেব দুহাতে বিলিয়ে দিতে লাগলেন।

বিশাল রাজকোষ ক্রমে শূন্য হয়ে এল, কিন্তু মন্দির থেকে তাঁরা যে দুটি ফল নিয়ে এসেছিলেন, তা যেমন শুকনো তেমনই রইল। বিজয়া দুঃখিত হয়ে বললেন, “আর আমাদের কি আছে যে দেব ? এততেও দেবতা সন্তুষ্ট হলেন না ?”

মল্লদেব দীর্ঘশ্বাস ফেলে বললেন, “দেখা যাক, একেবারে সর্বস্ব দিয়েও দেবতাকে তুষ্ট করা যায় কিনা। সামনের পূর্ণিমায় আমরা প্রাসাদের দ্বার

## কথা-সংকল

সাধারণের কাছে খুলে দেব। সেদিন আমাদের অদেয় কিছুই থাকবেনা। প্রাণও যদি কেউ চায়, তাও দিয়ে দেব। আশা করি, এইবার ভৈরব ভুষ্ট হবেন।”

রাণী তাতেই রাজী হলেন। রাজ্যে তাঁদের কঠিন প্রতিজ্ঞার কথা দেখতে দেখতে ছড়িয়ে পড়ল। সকলে উৎসুক হয়ে কবে পূর্ণিমা আসে, তারই দিন গুণতে লাগল।

পূর্ণিমা এসে পড়ল। মল্লদেবের নিজের রাজ্যের শুধু নয়, আশে পাশের রাজ্যের যত দীন দুঃখী প্রার্থীর দল এসে ভীড় করে দাঁড়াল। রাজা রাণী প্রাসাদের দরজা খুলে দিলেন, সবাইকে ডেকে বললেন, “যার যা নেবার ইচ্ছে, নিয়ে যাও ; আজ আমাদের অদেয় কিছু নেই।”

ভিখারীর দল স্রোতের জলের মত প্রাসাদের ভিতর ঢুকে পড়ল, দুহাত ভরে ধনরত্ন নিয়ে যেতে লাগল, যাবার সময় প্রাণ ভরে আশীর্বাদ করে যেতে লাগল রাজারাণীকে। ক্রমে ধনভাণ্ডার শূন্য হয়ে গেল, রাণীর বহুমূল্য অলঙ্কার, প্রাসাদের সুন্দর

গৃহসজ্জাগুলিও এক-এক করে অন্তর্হিত হ'ল। রাজারাণী চেয়ে দেখলেন, তখনও দু'জন মানুষ ব'সে আছে,—আর সকলের অভিস্ট সিদ্ধ হয়েছে, তারা চ'লে গিয়েছে।

রাণী বৃদ্ধা ভিখারিণীকে ডেকে বললেন, “তুমি কি চাও বাছা ? আমাদের আর কিছু ত দেবার নেই !” বুড়ী নিজের বীভৎস ক্ষত-চিহ্নিত মুখ তুলে বললে, “রাণীমা, আমার রূপ নেই, তার দুঃখে আমি বড় কাতর। দেশের লোকে আমার ঘেমা করে। তাই আপনার দেবী-প্রতিমার মত যে রূপ, তাই আমি প্রার্থনা করতে এসেছি।”

রাজারাণী বজ্রাহতের মত স্তব্ধ হয়ে গেলেন। তারপর রাণী দীর্ঘশ্বাস ছেড়ে বললেন, “তাই হোক। কিন্তু রূপ কি করে দেব বাছা ? এ কি দেবার জিনিস ?”

বুড়ী খোঁড়াতে খোঁড়াতে তাঁর কাছে এসে বললে, “আমার সারা গায়ে হাত বুলিয়ে বলুন, ‘আমার রূপ তোমার দেহে যাক, তোমার কুরূপ আমার দেহে আসুক’—তাহলেই হবে।”

## কথা শুধু

রাণী অকম্পিত-হাতে বুড়ীর গায়ে হাত বুলিয়ে  
কথাগুলি ব'লে গেলেন। দেখতে দেখতে  
ভিখারিণীর কদর্যরূপ ঘুচে গেল। বিজয়ার  
অপূর্ব-রূপরাশি তার অঙ্গে ফুটে উঠল, তার জরা  
আর কুরূপ বিজয়ার দেহে আশ্রয় নিল। ভিখারিণী  
হাসতে হাসতে আশীর্বাদ ক'রে চ'লে গেল।

তখন ভিখারী উঠে বললে, “মহারাজ, আমি  
অক্ষম বলহীন। মানুষের সমাজে আমি ছেয়।  
আপনার বল আর বীর্য আমি প্রার্থনা করি।  
আপনিও রাণীর মত ক'রে বল-বীর্য আমায় দান  
করুন।”

মল্লদেব বললেন, “তাই হোক।” ভিখারীর  
সর্ব্বাঙ্গে তিনি হাত বুলিয়ে দিলেন। তাঁর  
অসাধারণ বল-বীর্য সঙ্গে সঙ্গে তাঁকে ত্যাগ  
ক'রে গেল। কুরূপ এবং হীনবল হয়ে রাজারাণী  
প্রাসাদের ভিতর ফিরে চ'লে গেলেন।

প্রাসাদের প্রকাণ্ড ঘরগুলো সব শূন্য খাঁ খাঁ  
করছে। কোথাও কিছু নেই। শুধু রাণীর পূজার  
ঘরে সেই ভৈরবের মন্দির থেকে আনা কল ছুঁচি



## অস্বাভাবিক-বৈশিষ্ট্য

পাড়ে আছে। কিন্তু কি আশ্চর্য্য! ফল দু'টি ত আর শুকনো নেই? রসে রঙে সুগন্ধে ভরপুর হয়ে উঠেছে, সবে যেন রক্ত-জননীর কোড়চ্যুত হয়ে খ'সে পড়েছে।

রাণী বললেন, “আমাদের শেষ যথাসর্ব্বস্ব দিয়ে তবে দেবতাকে আমরা ভুক্ত করতে পেরেছি”— ব'লে ফলটি ভুলে নিয়ে তিনি আহাৰ করলেন। রাজাও তাই করলেন।

কিছুদিনের মধ্যেই রাজ্যে প্রচার হয়ে গেল যে প্রাসাদে রাজশিশুর আবির্ভাব হবে। প্রজাদের ঘরে আনন্দকোলাহল বেধে গেল। রূপ- ও শক্তি-হীন হয়ে পড়ায় রাজ্যে যে দুঃখের অঁধার নেমে এসেছিল, তাও যেন হঠাৎ লুপ্ত হয়ে গেল।

ভোরের আলো সবে যখন রাত্রির অন্ধকারকে পৃথিবীর সীমানা থেকে ঠেলে সরিয়ে দিচ্ছে, সেই সময় জন্ম নিলেন রাজকুমার তিমির-বরণ। তাঁর গায়ের রঙ শাণিত ইম্পাতের মত, তাই তিমির-বরণ নাম হল।

বাগবাজার ইন্ডিয়ান লাইব্রেরী  
ডাক সংখ্যা... ২৪০০৪...  
পরিগ্রহণ সংখ্যা...

## কথা-সংক্রমণ

রাজা ছেলেকে কোলে তুলে নিরেই অবাক হয়ে গেলেন। কোথায় গেল তাঁর দুর্বলতা আর অক্ষমতা? আগেকার সেই অমানুষিক বল-বীৰ্য্য এক নিমেষেই যেন তাঁর দেহে মনে ফিরে এল।

আবার সূতিকাঘরের দরজায় শাঁখ বেজে উঠল। রাজকুমারী জ্যোতির্লতা জন্ম নিয়েছেন, আর তাঁকে কোলে নিয়ে রাণী বিজয়া আনন্দে আর ফিরে পাওয়া রূপের প্রভায় গুরুা পূর্ণিমার মত শোভা পাচ্ছেন।

# অতি লোভ

( বিদেশী গল্প )

এক পাড়াগাঁয়ে পাশাপাশি দুই-ঘর গৃহস্থ বাস করে। একজন তাঁতি, সে বেচারী গরীব মানুষ, অনেকগুলি ছেলে-মেয়ে নিয়ে কয়েক দিন কাটায়। আর একজন মুদী, তার অবস্থা বেশ ভাল, ঘরে কিন্তু ছেলে-পিলে নেই। মুদী বড় কৃপণ, গরীব-দুঃখীকে এক-পয়সা দিতে কখনও তার হাত ওঠে না। তাঁতি যদিও তার দুঃখনার অত্যন্ত গরীব, তবু তার মনটা ভাল, পান্ডিত্যকে তার দরজা থেকে গরীব-দুঃখী কখনও কিরে যায় না।

পৌষ-পার্বণের আগের রাতে মুদী-গিৰি দরজায় খিল দিয়ে বসে ভাল ভাল পিঠে তৈরী করছে। দরজা বন্ধ করবার কারণ, যদি আশে-পাশের গরীব ছেলে-পিলে দেখতে পেয়ে ছু-একখানা চেয়ে বলে ? তাহলেই ত মুদী-গিৰির সর্বনাশ !

যেখানেই বাঘের ভয়, সেখানেই সন্ধ্যা হয়।

## কথা পুস্তক

পাটিসাপটার থালাটি বেশ ভর্তি ক'রে মুদী-গিন্নি সবে উঠবে, এমন সময় দরজায় বা পড়ল,—  
ঠক-ঠক-ঠক ।

মুদী-গিন্নি চ'টে, তাড়াতাড়ি পিঠের থালার উপর একটা ধামা চাপা দিয়ে, দরজা খুলে বাইরে উঁকি মারল । দেখে খুন্খুনে এক বুড়ী, গায়ে সাততালি দেওয়া ময়লা কাঁথা, দরজার সামনে দাঁড়িয়ে হি হি ক'রে কাঁপছে ।

মুদী-গিন্নি দাঁত-মুখ খিঁচিয়ে বললে, “তুই কি চাস রে ? এখানে মরতে এসেছিস্ কেন ?”

বুড়ী বললে, “সারাদিন কিছু খাইনি মা, রাতে বুড়ো-মানুষ চোখে দেখতে পাই না, আমাকে একটু জায়গা দেবে ? শীতে হাড়-গোড় জমে গেল ।”

মুদী-গিন্নি বললে, “বেরো, বেরো, আমার আর কাজ নেই, রাজ্যের যত ভিথিরীকে ঘরে জায়গা দেব । যা না ঐ তাঁতির বাড়ী, তাদের সুখ্যাত মানুষে পাঁচ মুখে করে, সে তোকে জায়গা দেবে এখন”—ব'লেই দড়াম্ ক'রে বুড়ীর মুখের উপর

## অতিশোক

দরজাটা বন্ধ ক'রে দিয়ে, পিঠের খালা নিয়ে ঘরে গিয়ে বসল।

বুড়ী শীতে ঠক্ ঠক্ ক'রে কাঁপতে কাঁপতে চলল তাঁতির বাড়ী। তাঁতিনীও তখন চারটি চাল-গুঁড়ো দিয়ে, ছেলে-ভুলনো খান-কতক পিঠে করতে বসেছে। নইলে বোকা ছেলে-মেয়েরা ছাড়ে না যে? মা-বাবার নেই বললে ত তারা শুনবে না! কাজেই যেমন ক'রে হোক তাদের ভূলাতে হবে। তাই চাল-গুঁড়ো আর গুড় দিয়ে তাঁতি-বোঁ পিঠে করছে। ছেলে মেয়েরা পাশে বসে দেখছে।

এমন সময় দরজায় ঘা পড়ল—ঠক্-ঠক্-ঠক্। তাঁতি-বোঁ পিঠের কড়া নামিয়ে রেখে গিয়ে দরজা খুলে দিলে। দেখে খুন্খুনে এক বুড়ী দাঁড়িয়ে, শীতে ঠক্ ঠক্ ক'রে কাঁপছে।

দেখেই তাঁতিনীর দয়া হল, সে জিগ্গেশ করলে, “কি চাও গা বাছা তুমি?”

বুড়ী বললে, “আমি দুদিন খাইনি মা, বুড়ো-মানুষ রাতে চোখে দেখি না, আমাকে একটু জায়গা দেবে?”

তঁাতিনী বললে, “তা এস বাছা, আমার  
যদিও একখানা মোটে ঘর, তবু এমন শীতের রাতে  
তোমাকে ত কিরিয়ে দিতে পারি না। যা হোক  
হুয়ুঠো খেয়ে এইখানেই শুয়ে থাক।”

বুড়ী ভেতরে এসে দাঁড়াল। তঁাতিনী ভাঙা  
খালয় করে খান-কয়েক পিঠে এনে তাকে খেতে  
দিল। ছেলে-মেয়েরাও তার চারধার ঘিরে  
পিঠে খেতে বসল। খাওয়া হয়ে গেলে সবাই  
সেই এক ঘরে ছেঁড়া মাদুর, কাঁথা, যে যা পেল,  
তাই পেতে শুয়ে পড়ল। বুড়ীও তাদের সঙ্গে গুল।

ভোর সাত্রে বুড়ী উঠে পড়ল। তঁাতিনীকে  
জাগিয়ে বললে, “মা আমি চললাম, তুমি ঘরে  
দোর দিয়ে শোও। তোমার মনটা বড় ভাল, তাই  
যাবার সময় বুড়ো মানুষ আমি তোমায় আশীর্বাদ  
করে যাচ্ছি। একটা কোনো ইচ্ছা কর, সে ইচ্ছা  
তোমার পূর্ণ হবে।”

তঁাতি-বৌ ভেবেই পোলে না কি ইচ্ছা করবে।  
অনেকক্ষণ পরে তার মনে পড়ল যে আগের দিন  
তার স্বামী খুব একখানা বাহারের শাড়ী কুণ্ডে

আরম্ভ করেছিল, কিন্তু সুতোর অভাবে বেশীকণ  
বুনতে পারেনি। সকালবেলা একটুকণ কাজ করে,  
সারাদিন তাকে বঁসে থাকতে হয়েছিল। তাই সে  
বললে, “আচ্ছা মা, আশীর্বাদ কর, আমাদের ঘরে  
সকালবেলা ঘেঁকাজ আরম্ভ হবে, তা যেন সারাদিন  
চলতে থাকে।”

বুড়ী বললে, “আচ্ছা, তাই হবে,”—বলে ঝাটি  
ঠক্ঠক্ করতে করতে ভোরের কুরাসরি মধ্যে  
মিশিয়ে গেল।

সকাল বেলা উঠে তাঁতি গিয়ে তাঁতে বসল।  
ধার করে অল্প একটু সুতো এনেছে যদি কাপড়খানা  
শেষ করতে পারে। তাঁতে হাত দিতেই তাঁত  
এমন জোরে চলতে আরম্ভ করল, যেন তার প্রাণ  
হয়েছে। কাপড়খানা শেষ হয়ে গেল, কিন্তু তাঁত  
আর থামবার নামও করে না। সেটা চলছে  
খটাখট্, কাপড়ের পর কাপড় বোনা হয়ে চলেছে  
আর প্রত্যেকটা আলাদা রকমের। তাঁতি শু  
একেবারে হতভম্ব, কি ব্যাপার বুঝতেই পারে না।  
স্বপ্ন তাঁতের সামনে থেকে উঠতেও পারে না।

## কথা-সংক্রমণ

কাপড়ের পর কাপড় বেরচ্ছে, আর ঘরের কোণে জমা হচ্ছে। এমন নানা রং-এর এত সুন্দর সুন্দর কাপড় কেউ এ গাঁয়ে চোখেও দেখেনি। তাঁতি-বৌ আর ছেলে-মেয়েরা চারদিকে দাঁড়িয়ে হাঁ ক'রে চেয়ে আছে, এমন কাণ্ড তারা জন্মে দেখেনি।

শেষে ঘরে আর কাপড় ধরে না, দরজা দিয়ে কাপড় বেরিয়ে উঠানে পড়তে আরম্ভ করল। শেষে উঠানও ভ'রে গেল। তখন গ্রামের লোক খবর পেয়ে ভীড় ক'রে এসে দাঁড়াল, তারাও ত কাণ্ড দেখে অবাক।

রাত্রি পর্যন্ত এই ব্যাপার চলল, তারপর তাঁতটা নিজে থেকেই থেমে গেল। কাপড়ের গল্প মুখে মুখে চারদিকে ছড়িয়ে পড়ল, আর কাছেই যে সহর ছিল, সেখান থেকে কাপড়ের ব্যাপারীরা এসে সব কাপড় বেশ ভাল দামে কিনে নিয়ে গেল। তাঁতির দুঃখ চিরদিনের মত ঘুচে গেল, ছেলে-পিলে নিয়ে সে সুখে ঘরকন্না করতে লাগল।

এদিকে সেই মুদী-বৌ ত ব্যাপার দেখে 'কপাল চাপড়ে মরে আর কি? সে থাকতে লক্ষ্মীছাড়ী



তাঁতি-বৌ কিনা এই রকম জ্বিতে গেল ? বুড়ীটা ত প্রথম মুদী-বৌএর ঘরেই এসেছিল, সে যদি বোকামী করে তাকে তাড়িয়ে না দিত, তা হলে তার ঐশ্বর্য আজ খায় কে ? মুদী তার দুঃখ দেখে সান্ত্বনা দিতে লাগল, “অত দুঃখ করে লাভ কি ? যা হবার তাই হয়েই গেছে ? আসচে বছর পিঠে-পার্বণের দিনে আবার সে আসবে হয়ত, তখন একটু সাবধান হয়ে কথাবার্তা কোয়ো ।”

দেখতে দেখতে বছর ঘুরে এল । আবার পিঠে-পার্বণের আগের রাতে মুদী-বৌ বসে পিঠে করছে, তার কান পড়ে আছে দরজার দিকে, কখন কে এসে দরজায় ঘা দেয় । সত্যি খানিক পিঠে হয়ে যাবার পরেই দরজায় ঘা পড়ল—ঠক্-ঠক্-ঠক্ ।

মুদী-বৌ তাড়াতাড়িতে প্রায় পিঠের থালা উল্টে ফেলে ছুটল দরজা খুলতে । দেখে কাঁথা মুড়ি দিয়ে এক বুড়ো দাঁড়িয়ে, শাদা দাড়ি তার পা অবধি লুটিয়ে পড়ছে ।

মুদী-বৌ খুব মিষ্টি করে জিগ্গেষ করলে, “হ্যাঁ গা বাছা, তুমি কি চাও ?”

## কথা-সংগ্রহ

বুড়ো বললে, “দু-তিন দিন কিছু খাইনি মা, আমাকে কিছু খেতে দেবে ?”

মুদী-বৌ মহা খাতির ক’রে বুড়োকে বললে, “এস, এস, ভেতরে এস। দেব বৈকি খেতে, না হলে গেরস্তর ঘর আছে কি করতে ?”

বুড়ো মহা আরামে আগুনের ধারে ব’সে পিঠে খেতে লাগল। মুদীও এসে পড়ল, দুজনের আদর-যত্নের ঘটনা দেখে কে ? বুড়ো খেয়ে দেয়ে চ’লে যেতে চায়, কিন্তু তারা তাকে জোর ক’রেই ধ’রে রাখল। সব চেয়ে ভাল ঘরে, ভাল বিছানা পেতে তারা বুড়োকে শুইয়ে রাখল।

ভোর রাতে বুড়ো উঠে মুদীর ঘরের দরজা ঠেলতে লাগল। মুদী আর তার বৌ দুজনেই জেগে ছিল, ধড়মড় ক’রে উঠে বেরিয়ে এল। বুড়ো বললে, “দেখ বাছা, আমি চললাম, আমার অনেক দূরের পথ যেতে হবে। তা তোমরা আমায় খুব আদর যত্ন করেছ, তোমাদের আশীর্বাদ ক’রে যাচ্ছি। একটা কিছু ইচ্ছা কর, সে ইচ্ছা পূর্ণ হবে।”

মুদী কিছু বলবার আগেই মুদী-বৌ ব’লে উঠল,



মুদী-বো কাঁচি দিয়ে কাপড় কেটেই চলেছে, কেটেই চলেছে



## অতিশোক

“আমরা সকালে যে কাজ আরম্ভ করব, সারাদিন যেন সে কাজ চলতে থাকে।”

বুড়ো বললে, “আচ্ছা,”—বলে দরজা খুলে বেরিয়ে চলে গেল।

মুদী বললে, “আচ্ছা কি কাজ আরম্ভ করা যায়, বল দেখি ?”

মুদী-বো বললে, “আমি সে সব ঠিক ক’রে রেখেছি। আমরা সকাল থেকে টাকা গুণব। দাঁড়াও ঐ চট ক’টা কেটে গোটা-কয়েক থলি তৈরী ক’রে রাখি, না হলে অত টাকা ধরবে কিসে ?”

এই বলে সে কাঁচি নিয়ে ব্যস্ত-ভাবে চট কাটতে আরম্ভ ক’রল। মুদী আবার ফিরে গিয়ে বিছানায় শুল এবং দেখতে দেখতে ঘুমিয়ে পড়ল। মুদী-বো ঐত ব্যস্ত হয়ে চট কাটছে যে কখন সূর্য উঠে সকাল হয়ে গেছে, তা সে টেরও পায়নি।

হঠাৎ মুদী ধড়মড়িয়ে উঠে বললে, “আরে আরে করছিস্ কি ? সকাল যে হয়ে গেছে ? টাকা গুণতে আরম্ভ করবি কখন ?”

আর তখন কে টাকা গোণে ? মুদী-বো কাঁচি

## কথা-সপ্তক

দিয়ে কাপড় কেটেই চলেছে, কেটেই চলেছে ।  
চট কখন শেষ হয়ে গেছে, সে এখন নিজের শাড়ী-  
গুলো কচাকচ্ করে কাটছে । তারপর মুদীর  
কাপড়, তারপর বিছানা, বালিশ, তোষক, লেপ,  
কম্বল, পরদা—সব একে একে কেটে শেষ করতে  
লাগল । কেউ আর কিছুতেই তাকে থামাতে  
পারে না । ঘর-দোরের সব জিনিষ বখন নিম্মূল  
হয়ে গেল, তখন সূর্য্য ডুবে অন্ধকার হয়ে গেছে ।  
মুদী-বোয়ের হাতের কাঁচি তখন থামল । গাদা  
করা কাটা কাপড়ের মধ্যে বসে তারা স্বামী-স্ত্রীতে  
মাথা চাপড়ে কাঁদতে লাগল ।

# কুঁড়ে শামুক

( বিদেশী গল্প )

এক গাঁয়ে এক পেটুক ছিল, তার নাম শ্যাম।  
গাঁয়ের লোকে তাকে শামু বলে ডাকত। শামু  
নামটা শেষে শামুক হয়ে দাঁড়াল, কারণ পেটুকটা  
হাঁটত অত্যন্ত আন্তে আন্তে।

শামুকই যে একলা পেটুক ছিল তা নয়, তার  
বোঁটিও খুব খেতে ভালবাসত, তবে সব জিনিষে  
তার রুচি ছিল না। ঝাল-চচ্চড়ি খেতে পেলে  
সে বেজায় খুসি। শামুক ত বেজায় কুঁড়ে, তাকে  
দিয়ে খাওয়া ছাড়া কোনও কাজই হয় না, স্তরাং  
রোজ রোজ ভাল জিনিষ খেতে তারা পাবে  
কোথায়? শামুকের বোঁ সারা সপ্তাহ স্ততো কাটে,  
শামুক সেই স্ততো হাটের দিন হাটে নিয়ে যায়,  
তা বিক্রী করে যা পায়, তাতেই তাদের সাতদিন  
চলে। হাট থেকে পয়সা নিয়ে ফিরবার পথে, শামু  
আর কিছু কিনুক আর নাই কিনুক, ঝাল-চচ্চড়ি

## কথা-সংগ্রহ

রাঁধবার তরকারিটা ঠিক নিয়ে যায়, নইলে স্ত্রীর হাতে আর রক্ষা থাকবে না।

একদিন হাটে স্নতোগুলো বেশ চড়া দামে বিক্রী হ'ল। শামু মহা খুসি, ভাবলে পথে যেতে যেতে কোনও একটা মিঠাইয়ের দোকানে কিছু মিঠাই খেয়ে যাওয়া যাবে। হাতে ত পয়সা আছে, বৌ-এর চচ্চড়ির তরকারি কিনেও কিছু বাকি থাকবে। বাড়ী ফিরবার পথেই বেশ বড় একটা ময়রার দোকান, শামু মোজা গিয়ে তার ভিতর ঢুকল। একবার খেতে আরম্ভ ক'রেই সে দুনিয়ার সব কথা ভুলে গেল। ক্রমাগত খেয়েই চলল, চারদিকে যত সুন্দর সুন্দর খাবার দেখে, তত তার ক্ষিদে বেড়ে যায়।

শেষে সন্ধ্যে হয়ে এসেছে দেখে ময়রা বললে, “কি হে শামুক, একটানা খেয়ে চলেছ যে? পয়সা আছে ত ট্যাকে?”

শামু দাম দেবার জন্যে ট্যাক থেকে পয়সাগুলি বার করল। কিন্তু দাম চুকিয়ে দিতে গিয়ে দেখে, প্রায় সবই শেষ হয়ে গেল, বাকি মাত্র ছ'টা



## বুড়ে শামুক

পয়সা। সে খেয়েছে কি কম ? ময়রা পয়সা গুণে নিয়ে বললে, “এইবার কেটে পড় বাপধন, রাত হয়ে এসেছে।”

শামু বাইরে বেরিয়ে এল। তার মাথায় তখন আকাশ ভেঙে পড়েছে। মাত্র ত ছ’টা পয়সা হাতে, সারা সপ্তাহ খাবে কি দিয়ে ? বৌ-এর জন্যে যদি ঝাল-চচ্চড়ির তরকারিও নিয়ে যেতে পারত ত বৌ না-হয় একটু ভাল মেজাজে থাকত। এখন শামু ছ’পয়সা নিয়ে ঘরে ঢুকলেই ত সে ঝাঁটা নিয়ে তাড়া করবে।

খানিক দূর এগিয়ে শামু দেখল, রাস্তার ধারে আরো একটা ছোট মিঠাইয়ের দোকান। এত যে খেয়েছে, তবু শামুর লোভ যায়নি। সে ভাবলে এ-ছ’টা পয়সা থাকলেই কি আর গেলেই কি; বৌ-এর কাছে সমানই বকুনি খাব। তার চেয়ে আরও গোটা-কয়েক মিঠাই খেয়ে নিই। যেমন ভাবা, তেমনই দোকানে ঢোকা। দেখতে দেখতে সেই ছ’টি পয়সাও দোকানীর পকেটে অদৃশ্য হয়ে গেল।

## কথা-সংক্রমণ

শামুর তখন সত্যি সত্যি ভাবনা হ'ল। এখন সে বাড়ী ফিরবে কোন্ মুখে? স্ত্রীর মূর্তি মনে ক'রে তার বেজায় ভয় করতে লাগল। শেষকালে কি মার খেয়ে মরবে? দোকানের বাইরে একটা গাছতলায় ব'সে, সে ক্রমাগতই ভেবে চলল, কি ক'রে আবার কিছু পয়সা রোজগার করা যায়। পয়সা না নিয়ে যে ফেরা যাবে না, সে বিষয়ে তার কোনো সন্দেহ ছিল না। ভাবতে ভাবতে গাছতলাতেই সে ঘুমিয়ে পড়ল।

ভোর বেলা ময়রা যখন দোকান খুলছে, তখনও শামুকে দে'খে অবাক হয়ে গেল। বললে, “কিহে শামুক, সত্যিই শামুক হয়েছ নাকি? সারারাত ধরে ঐ টুকু গিয়েছ?”

শামু বললে, “আমি বড় বিপদে পড়েছি ভীই, কিছু পয়সা না নিয়ে যদি বাড়ী যাই, তা হলে মার খেয়ে মরব। কি ক'রে পয়সা উপার্জন করা যায় বলতে পার?”

দোকানী বললে, “এক কাজ কর, পাশের গাঁয়ের জমিদার-গিন্নীর একটা হীরার আংটি হারিয়ে

গেছে, কিছুতেই পাওয়া যাচ্ছে না। তারা বলেছে, যে সেই আংটি খুঁজে দেবে তাকেই তারা একশ' টাকা দেবে। তুমি গিয়ে আংটিটা খুঁজে দেখ না, যদি কপাল-গুণে পেয়ে যাও ত কোনো ভাবনাই থাকে না।”

শামু ভাবলে, “মন্দ নয় ত, একটু খুঁজে দেখাই থাক না, যদিই পেয়ে যাই,”—এই ভেবে সে গুটি গুটি পাশের গাঁয়ের রাস্তা ধরল।

জমিদার-বাড়ী পৌঁছে সে বললে যে সে একজন মস্ত যাদুকর, মন্ত্রের বলে সে যা খুসি তাই করতে পারে। জমিদার বা তাঁর গিন্নী যে শামুর কথা বিশেষ বিশ্বাস করলেন তা নয়, তবু চেষ্টা করতে ত ক্ষতি নেই। তাই জমিদার-গিন্নী বললেন, “বেশ ত খুঁজে দেখ না? মন্ত্রের জোরে যদি আংটিটা বার করতে পার, একশ' কেন, তোমায় দেড়শ' টাকা দেব। কিন্তু তিন দিনের ভেতর না যদি পার, তাহলে তোমায় মাথা মুড়িয়ে ঘোল ঢেলে বিদায় ক'রে দেব।”

শামু ত আদাজল খেয়ে আংটি খুঁজতে লেগে

## কথা-সংকল

গেল। প্রথমে সে শুরু করল বাগানটা খুঁজতে,—  
প্রত্যেক গাছতলা, গর্ত, পাতার গাদা সব উল্টে.  
পাণ্টে কতবার যে সে দেখল, তার ঠিক-ঠিকানা  
নেই। পিঁপড়ের গর্তগুলি শুধু সে মাটিতে উপুড়  
হয়ে পড়ে খুঁজে দেখল।

শামু ত বাগান খুঁজছে, এমন সময়ে দেখল যে  
বাগানের এক কোণে জমিদার বাড়ীর তিনটে চাকর  
দাঁড়িয়ে কি সব ফিস্ ফিস্ করে বলাবলি করছে।  
শামুর তাদের দেখে লজ্জাও হ'ল, রাগও হ'ল; সে  
ভাবলে, “আমি কি রকম শুধু শুধু হয়রান হচ্ছি  
তাই দেখবার জন্যে বেটাটা দাঁড়িয়ে আছে।”  
এই না মনে ক'রে, সে সোজা হয়ে দাঁড়িয়ে, তাদের  
দিকে কটমট্ ক'রে তাকাতে তাকাতে সেখান ছেড়ে  
চ'লে গেল।

সে চ'লে যেতেই চাকরদের ভিতর একজন  
আর একজনকে বললে, “আরে এটা সত্যিই যাদু  
জানে নাকি? আমাদের দিকে কি রকম ক'রে  
তাকাচ্ছে দেখ? কে আংটি নিয়েছে সত্যিই বুঝতে  
পেরেছে নাকি?”

## বুঁড়ে শামুক

রাত্রে খাওয়া দাওয়ার পর জমিদার-গিন্নী শামুকে ডেকে বললেন, “কি, তুমি খোঁজ পেলে কিছু ?”

শামু বললে, “এখনও পাইনি ।”

জমিদার-গিন্নী বিরক্ত হয়ে একটা চাকরকে ডেকে বললেন, “একে শোবার জায়গা দেখিয়ে দাও গিয়ে ।”

চাকরটা চলল তার সঙ্গে । শোবার ঘরে গিয়েই শামু ধপ্ করে বিছানায় বসে পড়ল, দীর্ঘশ্বাস ছেড়ে বললে, “হায়, হায়, তিনটের একটা ত গেল !” অর্থাৎ তিন দিনের একটা দিন চলে গেল ।

চাকরটা ঠিক সেই সময়ে ঘর থেকে বেরিয়ে যাচ্ছিল । সে শামুর কথা শুনে বেজায় ভড়কে উর্দ্ধশ্বাসে দৌড় দিল । নিজের সঙ্গীদের কাছে গিয়ে বলল, “ও ভাই সর্বনাশ হয়েছে, লক্ষ্মীছাড়া যাদুকরটা সব জেনে ফেলেছে । আমায় দেখে বললে কিনা, ‘হায়, হায়, তিনটের একটা ত গেল ।’ ”

## কথা-সংকলন

এই তিনজন চাকর মিলেই গিন্নীর আংটিটা চুরি করেছিল। কাজেই তারা এখন থেকে খুব সাবধান হয়ে শামুর চলা-ফেরা লক্ষ্য করতে লাগল।

দ্বিতীয় দিন শামু জমিদার বাড়ীর আনাচ্ কানাচ্ ঘর দোর, রান্নাঘর, গোয়ালঘর, ঘোড়ার আস্তাবল সব খুঁজে দেখল। কিন্তু আংটি কোথাও পাওয়া গেল না। সেদিনও জমিদার-গিন্নী শামুকে ডেকে আংটির খবর নিলেন, তারপর একটা চাকরকে ডেকে তাকে শোবার ঘর দেখিয়ে দিতে বললেন। শামুর মনটা আজকে আরো খারাপ ছিল, কারণ দু'টো দিনই বৃথায় চলে গেল, আর একদিন মাত্র বাকি। এরপর তার মাথা মুড়িয়ে ঘোল ঢেলে দেওয়া হবে। সে খাটে বসেই বললে, “হায় রে কপাল, আর একটাও ত চলল।”

দ্বিতীয় চাকরটা এই কথা শুনবামাত্র প্রাণপণে ছুট দিল। হাঁফাতে হাঁফাতে বন্ধুদের কাছে গিয়ে বললে, “ভাই রে, আমাদের হয়ে এসেছে। ও সবই জানতে পেরেছে, কালই বোধ হয় গিন্নীমাকে ব'লে দেবে। আমাদের কি হবে?”

অনেকক্ষণ পরামর্শ করে তারা ঠিক করল যে শামুকে সব খুলেই বলা হবে। তাকে অনুময় বিনয় ক'রে দেখতে হবে যাতে সে জমিদার-গিন্নীকে কিছু না বলে। চাকররা চুরি-টুরি ক'রে যে টাকা জমিয়েছে, তার থেকেও খানিকটা শামুকে দেওয়া হবে ব'লে তারা স্থির করল।

তারপর দিন টাকাকড়ি দিয়ে শামুকে খানিক ঠাণ্ডা ক'রে, তারা আন্তে আন্তে হীরার আংটিটা বার ক'রে শামুর হাতে দিল। অনেক ক'রে তার হাতে পায়ের ধ'রে ব'লে দিল যে তাদের নাম যেন কারও কাছে বলা না হয়।

শামু খুব গস্তীর মুখ ক'রে বললে, “দেখলে ত বাবা, ধর্মের কল বাতাসে নড়ে। আচ্ছা, তোমরা যখন এত ক'রে বলছ, তখন এবার আর আমি কথাটা ফাঁশ করবা না, কিন্তু ফের যদি এমন কর্ম কর ত দেখতে পাবে।”

শামু তারপর ভাবতে বসল কি উপায়ে আংটিটা ফেরৎ দেওয়া যায়। সোজাসুজি দিতে গেলে নিজেকেই মুস্কিলে পড়তে হবে, কোথায়

## কথা-সংগ্রহ

পেল, কি রক্তান্ত, সব গুছিয়ে বলা শব্দ হবে ।  
তার চেয়ে একটা ফন্দী করা যাক ।

সে এক দলা ভাতের ভিতর আংটিটা লুকিয়ে  
পুকুর ধারে চলল । এক পাল হাঁস পুকুর পাড়ের  
কাদায় ঘোরা-ঘুরি করছিল । তাদের একটার  
সামনে ভাতের দলাটা ফেল্বামাত্র সে সেটা টপ্-  
ক'তে গলে নিল ।

ঘণ্টা-খানিক পরে শামু গিয়ে জমিদার-গিন্নীর  
কাছে হাজির । বললে, “গিন্নীমা, আপনি অনর্থক  
চাকরবাকরদের সন্দেহ করছিলেন । আসল চোর  
যে সে ধরা পড়েছে ।”

জমিদার-গিন্নী ব্যস্ত হয়ে বললেন, “কৈ,  
কোথায় সে ?”

শামু গিয়ে হাঁসটাকে ধ'রে নিয়ে এসে বললে  
“এর পেটে পাবেন, আমি মন্ত্র-বলে জানতে  
পেরেছি ।”

হাঁসটা মারবার পর যখন সত্যি সত্যিই তার  
পেট থেকে আংটিটা বেরল, তখন শামুর খাতির  
দেখে কে ?



কিন্তু শামু বেচারার অদৃষ্টে তখনও ভোগ ছিল। জমিদার-গিন্নীর ধারণা হ'ল যে শামু নিশ্চয়ই একটা কিছু ফন্দী খাটিয়েছে, আসলে মন্ত্র-তন্ত্র কিছুই সে জানে না। তাকে আর একবার পরীক্ষা করবার জন্যে তিনি বললেন, “আমি তোমার ক্ষমতা দেখে মুগ্ধ হয়ে গেছি। আমাদের আর একটা কিছু দেখাও।”

শামুর মাথায় ত আকাশ ভেঙে পড়ল। কিন্তু কি আর করে, মুখে বললে, “যে আজ্ঞে, আপনি যা দেখাতে বলবেন, তাই দেখাব।”

জমিদার-গিন্নী উঠে নিজের ঘরে গেলেন, তারপর খানিক বাদে শামুকে ডেকে পাঠালেন। শামু গিয়ে দেখে, তিনি একখানা রেকাবীর উপর আর একখানা রেকাবী চাপা দিয়ে রেখেছেন। আর ঘর ভর্তি লোক হাঁ করে সেটার দিকে চেয়ে আছে।

শামু যেতেই জমিদার-গিন্নী বললেন, “দেখ, তোমায় বলতে হবে এই রেকাবী-ছুটোর মাঝখানে কি আছে। যদি ঠিক বলতে পার, তাহলে দেড়

## কথা-সংক্রমণ

শ' টাকার উপরে আরো পঞ্চাশ টাকা তোমায় দেওয়া হবে, আর যদি না পার, তাহলে মাথা মুড়িয়ে ঘোল ঢেলে তোমাকে এখান থেকে বার ক'রে দেওয়া হবে।”

শামু ত মহা ফাঁফরে পড়ল। সে খানিকক্ষণ একেবারে চুপ ক'রে ব'সে রইল। কত কিছু যে ভাবল তার ঠিক নেই, কিন্তু মুখ ফুটে বলতে সাহস করল না। একবার যদি ভুল বলে, তাহ'লে আর সে ভুল শোধরাবার সুযোগ পাবে না।

একবার ভাবল, প্রাণপণে চোঁ চাঁ দৌড় দেবে, কিন্তু বাড়ী গেলেও ত ঝাঁটা খেতে হবে! কি যে করা যায়?

অবশেষে হতাশ হয়ে সে ব'লে উঠল, “হায় রে শামুক, তোর দশা কি হল।”

জমিদার-গিন্নী তৎক্ষণাৎ হাততালি দিয়ে ব'লে উঠলেন, “কি আশ্চর্য! তোমার ক্ষমতা সত্যিই অসাধারণ।” রেকাবীটা তুলবামাত্র দেখা গেল, তার ভিতর একটা শামুক ম'রে প'ড়ে রয়েছে।

তখন আর শামুকে পায় কে? জমিদার-গিন্নীর

## কুঁড়ে শামুক

কাছে দু'শ টাকা নিয়ে সে ত নাচতে নাচতে বাড়ী  
চ'লে গেল ।

তারপর তার বৌ দিনে পাঁচবার করে ঝাল  
চচ্চড়ি খেতে লাগল, আর শামু মিঠাই খেয়ে  
খেয়ে প্রায় অস্থখ বাধিয়ে বসবার জোগাড় ।

## পেটুক ভজু

বাংলাদেশের এক গৃহস্থের ঘরে একটিও ছেলে নেই। তার গোলা ভরা ধান, গোয়ালভরা গরু, বাগানভরা ফল, তরকারি। কিন্তু খাবার লোকই নেই। গৃহস্থ আর তার বউ, কতই আর খাবে? মনের দুঃখে তারা কেঁড়ে কেঁড়ে দুধ নদীর জলে চেলে দেয়। রাশি রাশি ফল পাড়ার ছেলে-মেয়েদের বিলিয়ে দেয়। তারপর খালি মাথা চাপড়ায় আর কাঁদে, “একটা যেমন তেমন বোকা হাবা ছেলেও যদি হ’ত। ঘরে বসে ঘরের জিনিষ খেত, দুটো চোখ একটু জুড়োত।”

মানুষ বা চায়, ভগবান্ কখনও কখনও তাকে ঠিক তাই দিয়ে বসেন। এতকাল ছেলে-পিলে কিছুই ছিল না, হঠাৎ গৃহস্থের বউয়ের এক ছেলে হ’ল। আনন্দে তারা ত একেবারে দিশেহারা হয়ে গেল, ছেলে নিয়ে কি যে করবে কিছু ভেবে পায় না।

কিন্তু এ আনন্দ তাদের বেশী দিন রইল না। ছেলে ত নয়, ঠিক রান্ধস। এমন ভয়ানক সে খেতে লাগল যে তার বাবা, মা, আত্মীয়-স্বজন সব বিষম ভড়কে গেল। হাঁটতে শিখবার আগেই তাদের ছেলে ভজু হামাগুড়ি দিয়ে গিয়ে বড় এক এক কড়া দুধ চুমুক দিয়ে শেষ ক'রে রাখত। প্রথম দিন কেউ বিশ্বাস করল না, বাড়ীর হলো বেরালটা শুধু শুধু মার খেয়ে মরল।

কিন্তু একদিন গৃহস্থ রান্নাঘরের জান্নার পাশে লুকিয়ে রইল। ভজুর মা তাঁড়ার ঘরে ব'সে তরকারি কুটছে, ভজু হামাগুড়ি দিয়ে খেলা করছে, মায়ের দরজাটা খোলা। মা অন্তমনস্ক হয়ে আলু ছাড়িয়ে যাচ্ছে, খোকা কখন হামা দিতে দিতে টুক ক'রে চোঁকাট পার হয়ে গেল। কড়াভরা দুধ জ্বাল দেওয়া রয়েছে, তার পাশে গিয়ে চুমুক দিতে লাগল। চোঁ চোঁ চোঁ—কড়া প্রায় খালি হয়ে এসেছে, এমন সময় ভজুর বাবা ছুটে এসে ছেলের পিঠে এক চড় বসিয়ে দিল।

ছেলে ভ্যা করে কেঁদে উঠতেই, তার মা বঁটি

## কথা-সংকলন

ফেলে উর্দ্ধ্বাসে রান্নাঘর ছুটে এল। স্বামীকে তাড়া দিয়ে বললে, “তুমি কি ক্ষেপেছ? এইটুকু ছেলেকে ধ’রে মারছ কেন?”

ভজুর বাবা বললে, “আমি ত মাত্র একটা চড় মেরেছি, এর পর দেশশুদ্ধ লোক ওকে বাঁশ-পেটা করবে। এখনই এক কড়া দুধ শেষ করল, এরপর ও মানুষ ধ’রে খাবে। ওকি মানুষ, ও রান্ধস।”

ভজুর মা ছেলেকে কোলে নিয়ে বকতে বকতে চলে গেল। একটা ত মোটে ছেলে, না-হয় এক কড়া দুধই খেয়েছে। আগে ত দুধ জলে ফেলে দেওয়া হত। ঘরের ছেলে খেলে ত খুসী হওয়ারই কথা!

কিন্তু ভজু বেচারার অদৃষ্টে এত আদর সইল না। সে চার বছরের হতে না হতে তার মা গেল ম’রে। কিছু দিন পরেই তার বাবা আর একবার বিয়ে করে বউ নিয়ে এল।

সৎমা কোনও দিন ভাল হয় না, ভজুর সৎমাও হল না। সে এসেই কোথায় কি জিনিষ বেশী খরচ হচ্ছে, কোথায় কি নষ্ট হচ্ছে, সব গোছাতে

## শেট্টিক ভজু

ব'সে গেল । সৎমা ভজুকে খুব মেপে-জুখে খেতে দিতে লাগল । ভজু সাধারণ ছেলে-মেয়ের চেয়ে পনেরো-কুড়িগুণ বেশী সচরাচর খেত, কাজেই এই অবস্থায় তার দুর্গতির সীমা রইল না । ক্ষিদের জ্বালায় অস্থির হয়ে সমস্ত দিনরাত চীৎকার করত । পাড়াপড়শী সকলে “রাফস ছেলে” ব'লে গাল দিতে লাগল এবং বাপ উত্ত্যক্ত হয়ে ক্রমাগত দিতে লাগল কানমলার উপর কানমলা ।

কানমলায় ত আর পেট ভরে না ? কাজেই বাধ্য হয়ে ভজুকে চুরি ধরতে হ'ল । ঘরে ধরা পড়লেই, তার সৎমা ঝাঁটা-পেটা করত, বাইরে ধরা পড়লে সেখানেও মার । সৎমার ক্রমে দুই-তিনটি ছেলেমেয়ে হওয়াতে ভজুর উপর অত্যাচার আরও বেড়ে গেল । বনের ফল, শাকপাতা যা পায় তাই খেয়ে পেটের আগুন নিভায় । তাকে কেউ লেখাপড়াও শেখাল না, কাজকর্মও শেখাল না । তার একমাত্র বিদ্যে হ'ল খাওয়া, কিন্তু সে খাওয়া যে কোথা থেকে জোটে তার ঠিকানা নেই । গ্রামে যখন কোনও

## কথা-সপ্তক

বাড়ীতে বিয়ে কি শ্রাদ্ধ থাকত, তখনই যা এক ভজুর কপাল খুলত। পেট ভ'রে খেতে ত সে পেতই, তার উপর অনেকে তার খাওয়ার বহর দেখে খুসি হয়ে দু'চার আনা ক'রে বখশিষ্ দিত। তবে এমন স্নদিন বেশী ঘন ঘন আসত না।

কিন্তু তার পোড়া অদৃষ্টি এ স্নখও বেশী দিন সইল না। তার বাপও মারা গেল। সৎমা তখন চেলাকাঠ নিয়ে ভজুকে তাড়া ক'রে বাড়ীর বার করে দিল। গ্রামে কেউ তাকে জায়গা দিল না, অমন হাতীর খোরাক জোটাবে কে? কাজেই বেচারী ভজুকে গ্রাম ছেড়ে চ'লে যেতে হ'ল।

সে চলতেই লাগল। কোথাও ভিক্ষে ক'রে খায়, কোথাও কুড়িরে খায়। যেখানে কিছু না জোটে, সেখানে শাকপাতা তুলে খায়। এঁর রকম ক'রে মাসের পর মাস চলতে চলতে সে মস্ত বড় এক সহরে এসে উপস্থিত হ'ল। নূতন যায়গা, কাজেই প্রথম প্রথম তার খাওয়ার কষ্ট হ'ল না। তামাসা দেখবার জন্যে অনেকেই তাকে ডেকে খেতে দিল।



একদিন ঠিক বাজারের মাঝখানে সে খেতে বসে গিয়েছে, এমন সময় ভীড়ের ভেতর থেকে একজন লোক ছুটে এসে তার হাত ধরে দাঁড় করিয়ে দিল। ভজু ত হাঁটু-মাঁটু করে কেঁদে উঠল। তার পাতে তখনও রাশীকৃত ডাল-ভাত মাখা, সে-সব শেষ না করে নড়া যায়? সে চীৎকার করে বলতে লাগল, “আমি না খেয়ে যাব না, তোমরা আমাকে ধোরো না।”

যে লোকটি তাকে ধরে দাঁড় করিয়েছিলেন, তাঁর বেশ জমকালো পোষাক। তিনি বললেন, “তুমি কেঁদো না হে ছোকরা, আমার সঙ্গে এস, তোমার খাওয়ার বেশ ভাল ব্যবস্থা করব। তুমি কোথা থেকে আসছ?”

— ভজু বললে, “আমি অনেক দূরের গাঁ থেকে আসছি। আমার মা-বাবা নেই। সৎমা ভয়ানক মারে, তাই আমি পালিয়ে এসেছি।”

সে লোকটি সেই দেশের একজন রাজকর্মচারী। তিনি খুব উৎসাহিত হয়ে বললেন, “বেশ, বেশ, ঠিক তোমার মত একজন ছেলেই আমরা খুঁজছিলাম।

## কথা-সংক্রমণ

তুমি আমার সঙ্গে রাজবাড়ীতে চল। বেশ ভাল কাজ পাবে।”

ভজু ডাল-ভাতের রাশের দিকে চেয়ে বললে,  
“আগে খেয়ে নি, তারপর যাব।”

রাজকর্মচারী বললেন, “এ ছাই ডাল-ভাতের  
জন্মে দেরি ক’রে কি হবে? তুমি চল আমার সঙ্গে,  
পেট ভ’রে লুচি মিঠাই খেতে পাবে।”

লুচি মিঠাইয়ের নাম শুনে ভজু আর দেরি  
না ক’রে তাড়াতাড়ি গট্ গট্ ক’রে হেঁটে এগিয়ে  
চলল।

এদেশের রাজার দুই রাণী। বড়-রাণীর দুই  
ছেলে, ছোট-রাণীর শুধু একটি মেয়ে। তিনি  
বড়-রাণী আর তাঁর ছেলেদের দুই চক্ষে দেখতে  
পারেন না। কি ক’রে তাঁদের পথ থেকে সরাবেন,  
এই খালি তাঁর চেষ্টা। রাজাও ছোট-রাণীর  
কথামত চলেন, কাজেই বড়-রাণী আর তাঁর  
ছেলেদের উপর নানারকম অত্যাচার চলে। ছোট-  
রাণীর প্রতাপ বেড়েই চলেছে। এখন এমন হয়ে  
দাঁড়িয়েছে যে বড়-রাণীর মহলে ঝি-চাকর শুধু কাজ

কর্তে ভরসা পায় না। দু-চারজন অনেককালের বুড়ো ঝি-চাকর ছাড়া আর সবাই পালিয়েছে। ভয়ে তাঁদের কাছে কোনও ছেলে-মেয়েও যায় না। একলা থেকে থেকে তাঁরা বড় মুষ্ড়ে পড়েছেন। দু-চারজন রাজকর্মচারী ভেতরে ভেতরে বড়-রাণীকে নানাভাবে সাহায্য করতেন। রাণী তাঁদের প্রায়ই অনুরোধ করতেন, ছেলেদের জন্যে একটি ছোকরা চাকর এনে দিতে। সে শুধু ছেলেদের সঙ্গে গল্প করবে আর খেলবে। ছেলেদের যত হাসাতে পারে, ততই ভাল। কিন্তু এরকম চাকর কিছুতেই পাওয়া যাচ্ছিল না। সহরের কোনও লোক রাজবাড়ীতে কাজ করবার জন্যে ছেলে দিতে চাইত না। আজ তাই পথের মাঝখানে ভজুকে পেয়ে রাজকর্মচারী-চারীটি ভারি খুসি হয়ে গেলেন। এ ছেলে মানুষকে না হাসিয়ে যায় না। এর পেটটা দেখলেই ত অতি বড় গম্ভীর মানুষেরও হাসি আসে।

রাজকর্মচারী ভজুকে বড়-রাণীর মহলে রাজকুমারদের কাছে নিয়ে গিয়ে বললেন, “দেখ ভজু,

## কথা-সংকল

তুমি এই রাজকুমারদের সঙ্গে খেলবে, আর তাঁদের খুব হাসাবে। এইটা যদি করতে পার, তাহলে যত খেতে চাও, পাবে।”

এইবার ভজুর দিনগুলি বেশ কাটতে লাগল। তাকে খেতে বসিয়ে মজা দেখা হল রাজকুমারদের এক কাজ। বলা বাহুল্য, এতে ভজুর কোনও আপত্তি ছিল না। খেয়ে খেয়ে পেটটি এমন ঢাকাই-জালার মত হয়ে উঠল যে লোকে তাকে দেখলেই হেসে মরে।

কিন্তু ভজুর কপাল যে ভাল নয়, তা তোমরা আগেই বুঝতে পেরেছ। রাজার হঠাৎ অসুখ করল। ছোট-রাণী ভাবলেন, রাজা যদি মারাই যান, তাহলে ত বড়-রাণীর ছেলে হবে রাজা, তিনি আর তাঁর মেয়ে পথে দাঁড়াবেন। সুতরাং এখন সাবধান হওয়া ভাল। রাজা ত বিছানায় পড়ে; ছোট-রাণী একখানা কাগজে তাঁর সই নিয়ে, বড়-রাণী আর তাঁর ছেলেদের বন্দী করবার আদেশপত্রের ক’রে ফেললেন। বড়-রাণী আর তাঁর ছেলেরা বন্দী হলেন। সহরের বাইরে পুরনো এক

## পেট্রিক ভজু

ছিল, জঙ্গল দিয়ে ঘেরা ; সেইখানে তাঁদের নিয়ে রাখা হল। ঝি-চাকরেরা খালি বাড়ীতে ব'সে কান্নাকাটি করতে লাগল। সব চেয়ে জোরে চেষ্টাতে লাগল ভজু, কারণ তার এত সাধের খাওয়া একেবারে বন্ধ হয়ে গেল।

দু-তিনদিন কান্নাকাটি ক'রে যখন কোনও লাভ হল না, তখন ঝি-চাকরেরা যে যার পথ দেখল। ভজু আর কোথায় যাবে ? সে লোককে জিগ্গেষ্ব করতে করতে সেই পুরনো দুর্গ টার কাছে গিয়ে হাজির হল। কোনও গতিকে যদি ভেতরে ঢুকতে পারে, তা হলে খাওয়ার ভাবনাটা যায়।

দুর্গের চারদিকে ত কড়া পাহারা, কেউ ভেতরে যেতে পায় না। পাথরের দেওয়াল দিয়ে ঘেরা ঘরে বড়-রাণী আর তাঁর ছেলেরা আছেন, সেই ঘর ছেড়ে তাঁরা বাইরে যেতে পারেন না। সহরের সব লোক 'হায় হায়' করছে, বড়-রাণী আর রাজ-কুমারেরা কি বেঁচে আছেন ? রান্ধসী ছোট-রাণী হয়ত তলে তলে তাঁদের মেরে ফেলবার ব্যবস্থা করেছেন। যে-সব সৈন্যেরা দুর্গ পাহারা দিচ্ছিল,

## কথা-সংকল

ভজু তাদের কাছে গিয়ে অনেক সাধ্য-সাধনা করতে লাগল। সে ছেলেমানুষ, তাতে অতি বোকা, তাকে ভেতরে যেতে দিলে কোনও আশঙ্কা নেই। কাজেই দু-চারজন যেতে দিতে এক রকম রাজীই হল। কিন্তু পাছে ছোট-রাণী জানতে পেরে গোলমাল বাধান, এই ভয়ে তাদের দলপতি শেষ পর্যন্ত ভজুকে ছাড়লেন না।

ভজু দু'দিন সেইখানেই ব'সে রইল। তৃতীয় দিন দেখা গেল, সৈন্যদের মধ্যে একটা কি ভয় চুকেছে। সবাইকার মুখ শুকনো, সব যেন পালাতে ব্যস্ত। ভজু এগিয়ে গিয়ে জিগ্গেষ করলে, ব্যাপারখানা কি? সৈন্যদের দলপতি বললেন, “বড়-রাণীমার বসন্ত হয়েছে। ও রোগ যেমন তেমন নয়, একজনের হলে আশের পাশের সকলের হবে।”

ভজু বললে, “তোমরা ত কেউ ওপরে যাও না, কি ক'রে জানলে যে তাঁর বসন্ত হয়েছে?”

দলপতি বললেন, “যে বুড়ীটা তাঁদের খাবার নিয়ে যায়, সে এসে বলেছে। এখন সে ত আর

## পেট্টিক ভজু

কিছুতেই ভেতরে যেতে রাজী নয়। ওঁদের খাবার পাঠাবার কি ব্যবস্থা করা যায় তাই ভাবছি। এখন কোনও লোকই আর ও ঘরে যেতে চাইবে না।”

ভজু বললে, “আমায় যেতে দাও ত আমি রাজী আছি। আমার খেতে পেলেই হল, আমি বসন্ত টসন্তকে গ্রাহ্য করি না।”

আর কোনও লোক যখন পাওয়াই যাবে না, তখন দলপতিকে অগত্যা রাজী হতে হল। ভজু খাবারের বোঝা মাথায় ক’রে নিয়ে, অনেক কষ্টে ভাঙা দেওয়াল ডিঙিয়ে ভেতরে গিয়ে ঢুকল। সেই পাথরের ঘরের কাছে গিয়ে দরজায় আস্তে আস্তে ঘা দিতে লাগল। খানিক পরে দরজা খুলে বড় রাজকুমার উঁকি মেরে দেখলেন।

ভজু মহা খুসি হয়ে ব’লে উঠল, “রাজকুমার, রাজকুমার, আজকে আমি খাবার নিয়ে এসেছি।”

রাজকুমারও খুসিই হয়েছেন মনে হল, তবু তাঁর মুখের ভাবটা কেমন কেমন যেন লাগল। ভজুকে হাতছানি দিয়ে ডেকে তিনি বললেন,

## কথা-সংক্রমণ

“শীগির ভেতরে চ’লে এস, আমি বেশীক্ষণ দরজা খুলে রাখতে পারব না।”

ভজু সব কিছু নিয়ে ভেতরে ঢুকে গেল। দেখলে, একখানা খাটের উপর কে একজন মুড়ি দিয়ে শুয়ে আছেন, আর-একখানা খাটের উপর ছোট রাজকুমার মুখ শুকিয়ে ব’সে আছেন। ভজু খাবার দাবার গুছিয়ে রেখে জিগ্গেষা করলে, “ঐ বুঝি রাণীমা? তিনি কি কিছুই খেতে পারেন না?”

বড় রাজকুমার বললেন, “চুপ, চুপ, অত জোরে চেষ্টাসনে, কে কোথা দিয়ে শুনে ফেলবে; মা এখানে নেই।”

ভজু অবাক হয়ে চোখ বড় বড় ক’রে বললেন, “তিনি কোথায় গেছেন? কি ক’রে গেলেন? চার দিকে ত লোক?”

বড় রাজকুমার বললেন, “তুই আমাদের নিজের লোক, তাই তোর কাছে বলছি, কিন্তু একথা যেন কিছুতেই বাইরে প্রকাশ না পায়। আমাদের মামার বাড়ীর লোকেরা আমাদের নিয়ে পালাবার জন্যে খুব চেষ্টা করছে। সামনাসামনি যুদ্ধ করলে



ত তারা হেরে যাবে, তাই লুকিয়ে আমাদের নিয়ে যেতে চায়। ঐ যে কোণটায় একটা পাথর আলগা দেখছি, ওটা স্ফুঙ্গের মুখ। কাল রাত্রে মা ওর ভেতর দিয়ে পালিয়েছেন। তিনি আগে যেতে চাননি, আমরা তাঁকে জোর ক'রে পাঠিয়েছি। ধরা পড়বার ভয়ে আমরা মায়ের বসন্ত হয়েছে ব'লে রটিয়েছি, আর একটা কাপড়ের বস্তা মায়ের খাটে ঢাকা দিয়ে রেখে দিয়েছি। একটা বোবা-কালী ঝাড়ুদার সন্ধ্যার সময় আমাদের ঘর বাঁট দিতে আসে, তাকে কিছু ভয় নেই। তবে যে লোকটা খাবার আনত, তাকে ভয় ছিল। তুই তার জায়গায় এসেছি, এখন কোনও ভয় নেই।”

ভজু বললে, “তোমরা সবাই কাল পালালে না কেন ?

রাজকুমার বললেন, “শুধু এ ঘরটার থেকে বেরলেই ত হবে না, এ রাজ্য থেকে বেরতে হবে। তা করতে চার পাঁচ দিন সময় লাগে। সবাই একসঙ্গে পালালে, পরদিন যখন খাবার আনবে,

## কথা-সংক্রমণ

তখনই সব কঁাস হয়ে যাবে। তাই পাঁচ ছ' দিন ধ'রে ক্রমাগত ওদের ধাঙ্গা দিতে হবে। কি ক'রে সেটা হবে, তাই ভাবছি।”

ভজু বললে, “আজ রাত্রে তোমরা দু'জন পালাও ত, তারপর দেখা যাবে। খাবার ত আমিই আনব, আর ঝাড়ুদার ত বোবা কালা, কাজেই চার পাঁচ দিন কেউ জানতে পারবে না। তারপর সময় বুঝে আমিও স'রে পড়ব।”

রাজকুমার বললেন, “কিন্তু আর একটা মুস্কিল আছে। তিনজনের যে গাদি গাদি খাবার আসতে থাকবে, সেগুলো কি হবে? ঝাড়ুদারকে বুঝিয়ে দেওয়া হয়েছে—ঘরের মধ্যে যা কিছু পাবে, সব ঝেঁটিয়ে নিয়ে যাবে। বাইরে বোধহয় ওরা সেগুলো নেড়ে চেড়ে দেখে নেয়, তার ভেতর দিয়ে আমরা কোনও খবর টবর পাঠাচ্ছি কিনা। যদি রাশ রাশ খাবার যেমন ঢুকছে তেমনই বেরছে দেখে, তখনই সন্দেহ করবে।”

ভজু একটুক্ষণ ভাবল, তারপর বললে, “তা হোক, তোমরা যাও। আমার আর কোনও

## পেট্টিক ভজু

শক্তি নেই, শুধু খেতে পারি। তা তোমাদের  
জন্মে না-হয় খেতে খেতে ম'রেই যাব। ঝাড়ু-  
দার শাল-পাতার ঠোঙা ছাড়া আর কিছু নিয়ে  
যাবার খুঁজে পাবে না।”

রাত্রি হতেই রাজকুমারেরা স্নুডঙ্গ দিয়ে  
পালালেন। পরদিন ভজু ঠিক সময়ে খাবার নিয়ে  
গিয়ে হাজির হল। ঘর খালি। তিন জনের  
বিছানার উপর সে কাপড় চোপড় বালিশ সাজিয়ে  
ঢাকা দিয়ে দিল, যেন তিন জন ঘুমচ্ছেন। তারপর  
ব'সে গেল খেতে। এমন চমৎকার সব খাবার,  
যত খায়, ততই তার ক্ষিদে যেন বেড়ে যায়।  
প্রায় সবই সে শেষ ক'রে ফেলল। তারপর আর  
তার উঠবার ক্ষমতা রইল না। মেঝেতে প'ড়ে  
সে ঘুম দিতে লাগল।

সন্ধ্যার সময় বোবা ঝাড়ুদার এসে তাকে  
গুঁতো মেরে উঠিয়ে দিল। বিছানায় কে আছে  
না আছে, তা আর চেয়েও দেখল না। রাত্রে এমন  
জায়গায় থাকতে ভজুর মোটেই ইচ্ছা ছিল না।  
সেও ঝাড়ুদারের পিছন পিছন বেরিয়ে পড়ল।

## কথা-সংক্রমণ

ঝাড়ুদার তার ঝাঁটা বালতি নিয়ে সোজা দলের দলপতির কাছে হাজির হল। সে ব্যক্তি উল্টে পাল্টে সব আবর্জনা-গুলো দেখে বললে, “খাবার কিছু কিছু থেকে গিয়েছে দেখছি।”

ভজু তাড়াতাড়ি বললে, “সকলেরই শরীর খারাপ কিনা, বেশী খেতে পারেন না।”

দলপতি বললেন, “আচ্ছা :এক কাজ জুটেছে বাবা ! কখন যে আমাদেরও বসন্তে ধরে তার ঠিক নেই। খুব বেশী অস্থখ নাকি ছেলেদেরও ? বড়ি-টড়ির ব্যবস্থা করতে হবে ?”

ভজু ভয় পেয়ে বললে, “না না, তেমন কিছু নয়। মায়ের অস্থখের জন্যে মন খারাপ, তাই তারা খেতে পারে না।” মনে মনে সে ঠিক করল, কাল ম’রে গেলেও সে সব খাবার শেষ করবে।

পরদিন খাবার নিয়ে গিয়েই সে খেতে ব’সে গেল। প্রাণ যায় তাও স্বীকার, তবু সে সব শেষ করবে। সন্ধ্যা হবার আগে, খাবারের স্তুপ শেষ হল বটে, কিন্তু ভজু বেচারার আর নড়বার চড়বার ক্ষমতা রইল না। কিন্তু রাত্রে ত এখানে থাকা

যায় না? কোনও রকমে সে বেরিয়ে এল। তার পেটের বহর দেখে দলপতি আর সৈন্যরা ত অবাক। দলপতি জিগ্গেষ করলেন, “ওহে একি হয়েছে?”

ভজু কৌকাতে কৌকাতে বললে, “কি জানি, কি অসুখ। পিলেটা ভয়ানক বেড়ে যাচ্ছে।”

তারপর দিনটাও এই ভাবে কাটল। সেদিন ভজু বেচারা আর নিজে বেরতে পারল না, ঝাড়ুদার কোনও মতে টানতে টানতে তাকে বাইরে নিয়ে এল। দলপতি বললেন, “এ ছোঁড়াও মরবে। এমন পিলে জন্মে কারো দেখিনি।”

সকালে উঠে ভজু ভাবছিল, আজ আর যাবে কিনা। পেটের যা অবস্থা হয়েছে, হঠাৎ ফেটেও যেতে পারে। তবু মনিবের জন্মে প্রাণ যায়, সেও স্বীকার।

সে আন্তে আন্তে যাচ্ছে, এমন সময় একটা লোক এসে তাকে ধরল। কানের কাছে মুখ নিয়ে জিগ্গেষ করল, “তোমার নাম ভজু?”

ভজু বললে, “হ্যাঁ।”

সেই লোকটি বললে, “আমি বড়-রাণীমার রাজ্য

থেকে আসছি। তাঁরা পৌঁছে গেছেন, তোমায় নিয়ে যেতে আমরা পাঠিয়েছেন। তোমাকে না হলে রাজকুমারদের কিছুতেই চলবে না।”

ভজু মনের আনন্দে বেরিয়ে পড়ল। নূতন দেশে গিয়ে, তার আদর দেখে কে? সবাই তাকে এত আদর করে খাওয়াতে লাগল যে, ভজুরও খাওয়ায় অরুচি ধরবার জোগাড়। সে বেশী খায় বললে, রাণী আর রাজকুমারেরা সবাই চটে যান, আর বলেন, “বেঁচে থাক আমাদের ভজুর খাওয়া। ঐ গুণে আমরা রক্ষা পেয়েছি।”

## নীলাশ্বরী

ভং ঢং ঢং, স্কুলের শেষ ঘণ্টা প'ড়ে গেল।  
সঙ্গে সঙ্গে ঝাঁক বেঁধে মেয়ের দল, স্কুল বাড়ীর সব  
ক'খানা ঘর খালি ক'রে চাতালে বেরিয়ে এল।  
গাড়ীবারাণ্ডার নীচে ভীড় সবচেয়ে বেশী। সার সার  
স্কুলের বাস গাড়ীগুলি দাঁড়িয়ে আছে। শিক্ষয়িত্রী  
একজন দাঁড়িয়ে আছেন, মেয়েরা ঠিক গাড়ীতে  
ওঠে কিনা তার তত্ত্বাবধান ক'রতে।

এটা হল কিছুদিন আগেকার কথা। তখনও  
সব স্কুলে এখনকার মত মোটর বাস হয় নি। বড়  
বড় ঘোড়াতেই স্কুলের গাড়ী টানত। কাজেই  
দু-তিন খেপ্ না গেলে চলত না। যারা দ্বিতীয়  
বারে কি তৃতীয় বারে যেত, তাদের বাড়ী পৌঁছতে  
অনেক দেরী হয়ে যেত। কাজেই অধিকাংশ  
মেয়েরই চেষ্টা ছিল, কি ক'রে শিক্ষয়িত্রীর চোখ  
এড়িয়ে প্রথম বারেই গাড়ীতে উঠে পড়া যায়।

## কথা-সপ্তক

ধরা প'ড়লে বেশ বকুনি আছে অদৃষ্টে কিন্তু সেই ন'টায় বাড়ী ছেড়ে বেরিয়েছে, পাঁচটা কি সাড়ে পাঁচটা পর্যন্ত ব'সে থাকতে কোনও মেয়েরই মন উঠত না। নিতান্ত যাদের বোর্ডিংএর কোনও মেয়ের সঙ্গে বেশী ভাব আছে, তারা দু-চারজন গল্প করবার লোভে থাকতে রাজী হত, আর কেউ না। বাকীরা লুকিয়ে চুরিয়ে গাড়ীতে উঠে, একেবারে ভিতর দিকের কোণে লুকিয়ে বসত, যাতে শৈলজাদি তাদের দৈ'খে নামিয়ে না দেন। অবশ্য এরকম নামিয়ে দেওয়াটাও প্রায় সকলের ভাগ্যেই ঘটত।

সুধার শরীরটা আজ ভাল ছিল না। ঝি আসেনি বাড়ীতে, কাজেই মা তাড়াহুড়া করে বেশী কিছু রান্না করে উঠতে পারেন নি। নিতান্ত আগুনের মত গরম ভাতে ডালের জল মেখে লেবু দিয়ে দু-চার গ্রাম খেয়ে সে চ'লে এসেছে। মা তাকে আসতে বারণই করেছিলেন, কিন্তু সে রাগ করে শোনেনি। নিত্য ঝি আসেনি; নিজের অসুখ, মায়ের অসুখ, এই-সব অছিলায় কত আর



কামাই করা যায় ? হেডমিষ্ট্রেসের কাছে বকুনি খেতে ত তাকেই হয় ? টিফিনের সময় সে কিছু খায় না। তাদের ঐ এক ঠিকে ঝি সম্বল, সে এতদূরে খাবার নিয়ে আসতে নারাজ। অনেক মেয়ে বোর্ডিংএ খরচ দিয়ে টিফিন খায়, সুধার বাবার অবস্থা ভাল নয়, তিনি তাও করতে পারেন না। কাজেই স্কুল যখন ছুটি হয়, তখন সুধার পেটটা একেবারে জ্বলে যেতে থাকে। সে আসে 'সেকেণ্ড বাসে', কাজেই প্রথমবারে খাবার অধিকার তার নেই, তবে প্রায়ই সে লুকিয়ে যায়, কোনওদিন ধরা পড়ে, কোনওদিন বা পড়ে না।


আজ তার খাবার তাড়া ছিল সবচেয়ে বেশী। শরীর ভাল নয়, ক্ষিদেও পেয়েছে ভয়ানক। ঝি নিশ্চয়ই এ বেলাও আসেনি, মা একলা-হাতে সব কাজ কখনও পেরে উঠবেন না। খোকাই তাঁকে জ্বালিয়ে খাবে। কিন্তু আজ যে যেতে পারবে, তা তার মোটেই আশা হচ্ছিল না। কে দু'জন মেয়ে বেড়াতে এসেছিল, স্কুলের পুরোনো ছাত্রী বোধ হয়। শৈলজাদির ঘরে বসে তারা সারাদিন গল্প

## কথা-সংক

করেছে, চা খেয়েছে, এখন নেমে এসেছে—বাড়ী ফিরবার জন্যে । ও মা, তিনি দেখি তাদের সুখাদের বাসেই ভুলে দিচ্ছেন । তা হ'লেই হয়েছে সুখার আজ আগে আগে বাড়ী যাওয়া । যাদের সত্যিই প্রথমবার যাবার পালা, তাদেরই দু'চারজনকে না নামিয়ে দেওয়া হয় ত চের ।

নিজের গোছান বইখাতা-গুলো নিয়ে সুখা চাতালের একটা কোণে, বড় একটা থামে ঠেশ দিয়ে ব'সে পড়ল । হলের ভিতর ঢুকতে আর তার ইচ্ছে করছিল না । মস্ত বড় চাতাল, জায়গায় জায়গায় শ্যাওলা প'ড়ে সবুজ, জায়গায় জায়গায় কালের প্রভাবে কালো এবং ভাঙ্গা, মস্ত মস্ত গোল থাম দিয়ে ঘেরা । এই চাতালটাতে টিফিনের ছুটিতে মেয়েদের খেলা, গল্প, দৌড়-ধাপ সব চলতে থাকে । এক কোণে খুপ'রীর মত একটা ঘর, তার ভিতর দিয়ে ছাদে যাবার সিঁড়ি । এইখানে 'ডে স্কলার' মেয়েদের জল খাওয়ার স্থান । বন্ধু-বান্ধবরা ডাকলে সুখাও মাঝে মাঝে এখানে ঢুকে খাবার খেয়েছে । আজ যদি তাকে কেউ ডাকত, মন্দ হত না ।

## নীলম্বরী



সুখা চাতালের একটা কোণে, বড় একটা থামে ঠেশ দিয়ে বসে পড়ল



তার চারপাশে মেয়ের দল ঘোরাফেরা ক'রে গল্প করছিল। স্কুলের ছুটির পর দৌড়াদৌড়ি ক'রে খেলার মত উৎসাহ কোনও মেয়েরই আর থাকে না, অর্ধেক তার মত ব'সে পড়ে, বাকি অর্ধেক গল্প ক'রে ঘুরে বেড়ায়।

তার সামনে দিয়ে কলেজের নিভাদির সঙ্গে পারুল বারবার ঘুরে যাচ্ছিল। নিভাদির সঙ্গে পারুলের বেজায় ভাব। এই নিয়ে স্কুল শুদ্ধ মেয়ে তাকে ঠাট্টা করে, কিন্তু পারুলের এতে গর্বের সীমা নেই। নিভাদির মত 'স্মার্ট' বিদুষী মেয়ে কলেজে ক'টাই বা আছে? দেখতে অবশ্য তিনি সুন্দরী কিছু নন, কিন্তু তাঁর পাশে দাঁড়ালে সুন্দরী মেয়েদেরও যেন কেমন হাবাগোবা দেখায়। তাঁর লম্বা ছিপ্ছিপে চেহারাটি ঠিক যেন আলোক-শিখার মত, কোথাও তার ভার বা জড়তা নেই। রং উজ্জ্বল শ্যামবর্ণ বড় জোর বলা যায়, কিন্তু যে রংএরই কাপড় পরুন, তাঁকে দিকি মানায়। ঐ ত পারুল তাঁর পাশে পাশে বেড়াচ্ছে, সেও ত ফর্সা ব'লেই বিখ্যাত, কিন্তু নিভাদির পরণে ঐ

## কথা-সপ্তক

যে জরিপ পাড় দেওয়া নীলাম্বরী শাড়ীখানা, ওখানা পারুল পরলে কি তাকে অত ভাল দেখাত ? কখনও না ।

আচ্ছা, নিভাদি ত বিশেষ বড় লোকের মেয়ে না, এত সাজেন কি ক'রে ? যে-রকম কাপড়-চোপড় তিনি রোজ প'রে কলেজে আসেন, সে-রকম কাপড় স্খার একখানাও নেই । উৎসব নিমন্ত্রণ প্রভৃতিতেও তাকে ধোওয়া মিলের শাড়ী প'রে যেতে হয়—এই দুঃখ আর লজ্জায় সে কোথাও যেতেই চায় না । না যাওয়ার কারণটা মা-বাবাকে জানানও শক্ত, তাঁরা অমনি বকতে ব'সে যাবেন—যেন ভাল জিনিষ ভাল লাগাটা মস্ত একটা অপরাধ । শাদাসিধে জীবনযাত্রা এবং মহৎ চিন্তা যে কত বড় জিনিষ, সেই বিষয়ে বাবার কাছে লম্বা একটা বক্তৃতা শুনতে হয় । বেশ ত, মহৎ চিন্তা কি একখানা ভাল কাপড় প'রে করা যায় না ? একথা মা-বাবা কিছুতেই বুঝবেন না । মা-বাবার দুঃখ-দারিদ্র্য বেশ ভাল ক'রে বুঝবার মত বয়স স্খার তখনও হয়নি ।

নিভাদির শাড়ীটা আজ স্খার চোখে বড়ই  
সুন্দর লাগছিল। স্খার গায়ের রং প্রায় ফর্শাই—  
এরকম একখানা শাড়ী হলে তাকে নিশ্চয় মানাত।  
কিন্তু কে বা তাকে দিতে যাচ্ছে। সামনের মাসে  
তার জন্মদিন বটে, কিন্তু কি যে সে পাবে তার তা  
জানাই আছে। যদি মায়ের হাতে পয়সা থাকে,  
তাহলে কাপড়ওয়ালী বিধুমুখীকে ডেকে আড়াই  
টাকা তিন টাকার একখানা তাঁতের শাড়ী কিনে  
দেবেন, না হলে সেই ধোওয়া মিলের শাড়ী।  
ভাবতেই স্খার চোখে জল এসে গেল। এত বয়স  
হল, অথচ একদিনের জন্যে একটা জরিপেড়ে  
কাপড়ও সে পরতে পেল না, সিল্কের কাপড় ত  
মাথায় থাক্। অথচ আশেপাশের বাড়ীর ছেলে-  
মেয়েগুলো জন্মাতে না জন্মাতেই সিল্ক-সার্টিনে  
মোড়া হয়ে থাকে। ঐ ত সেদিন তড়িৎদির  
খুকীটা হল; বাবা, মেয়ে হবার আগের থেকেই  
তার জন্যে দু'বাক্স কাপড়-জামা তৈরি হয়ে  
রইল।

ঘড়্, ঘড়্ ক'রে একটা গাড়ী এসে দাঁড়াল।

## কথা-সপ্তক

সুধা সচকিত হয়ে চেয়ে দেখল। ঐ ত সবে ফৈজুর গাড়ী এল, এর পর আসবে সৈয়দের গাড়ী, তারপর সুধাদের গাড়ী। এই গাড়ীতে নিভাদি যান, পারুল তাড়াতাড়ি ছুটে গিয়ে হলের ভিতর থেকে তাঁর গোছান বইখাতা সব নিয়ে এল। নিভাদি গাড়ীতে উঠে পড়লেন, অন্য মেয়েরাও দুটোছুটি করে এসে উঠল, গাড়ী ছেড়ে দিল।

পারুল গাড়ীর কাছ থেকে ফিরে এসে, কি মনে করে সুধার পাশে বসে পড়ল। বললে, “অমন হাঁড়ি-মুখ করে বসে আছিস কেন রে?”

পারুলকে সুধার বিশেষ কিছু ভাল লাগত না। তবু কথা যখন যেচে বলছে, তখন ত আর উত্তর না দিয়ে থাকা যায় না? বললে, “আমার আজ শরীরটা বড় খারাপ লাগছে।”

পারুল জিজ্ঞেস করল, “তাহলে ফার্ট বাসে চলে গেলি না কেন?”

সুধা বললে, “কোথায় আর জায়গা পেলাম? বাইরের দু’জন মেয়ে উপরি গেল।”

পারুল বললে, “তা বেড়া না? বসে থাকিস কি



ক'রে ? আমি ত হাজার ক্লাস্ত হলেও বসতে পারি না ।”

সুধা বিরক্ত হয়ে বললে, “তা নিভাদির পাশে বেড়াতে পেলে তোমার আর ক্লাস্ত লাগবে কোথা থেকে ? আমার ত আর ওরকম বন্ধু কেউ নেই ?”

পারুল খোঁচা খেয়ে পরম আপ্যায়িত হয়ে বললে, “সত্যি ভাই, নিভাদির সঙ্গে বেড়াতে পেলে আমার মোটেই ক্লাস্ত লাগে না । আচ্ছা, আজ তাঁকে ভারি সুন্দর দেখাচ্ছিল, না ? শাড়ীখানা কেমন লাগল তোর ?”

সুধা উপেক্ষার ভান ক'রে বললে, “কেমন আবার লাগবে, কাপড় যেমন হয় ।”

পারুলের বোধহয় আশা ছিল যে সুধা শাড়ী-খানার খুব উচ্ছৃঙ্খিত প্রশংসা করবে । সুধার কথায় একটু দ'মে গিয়ে বললে, “আমার কিন্তু ভাই ওটা ভারি ভাল লেগেছিল । কাপড়ওয়ালীর দু-পুঁটলি কাপড় তোলপাড় ক'রে তবে ওখানা আমি বার করেছিলাম ।”

## কথা-সংক্রমণ

সুধা বিস্মিত হয়ে ব'লে উঠল, “শাড়ীখানা তুমিই দিয়েছ নাকি নিভাদিকে ?”

পারুল ঘাড় নেড়ে হেসে বললে, “হ্যাঁ, জানুয়ারী মাসে ওঁর জন্ম-দিন না ? তখন দিয়েছি । একবারও পরতে দেখিনি, আমি অনেক ক'রে বলাতে আজ প'রে এসেছিলেন ।”

সুধা একটু ইতস্ততঃ ক'রে জিজ্ঞেস ক'রে বসল, “শাড়ীখানার দাম কত রে ?”

পারুল সগর্বে বললে, “বারো টাকা । বাবা, ছ-মাস পকেট-মাণি জমিয়ে তবে কিনেছি ।”

সুধা আবার জিজ্ঞেস করলে, “ওখানা এগার হাত ত ? দশ হাত একখানার দাম কত হয় তাহলে ?”

পারুল বললে, “টাকা দশ হবে বোধহয় । কেন তুই কিনবি নাকি ?”

সুধা নিজেকে সামলিয়ে নিয়ে বললে, “হ্যাঁ, আমি কিনব না আর কিছু । এমনি কথার কথা একটা জিজ্ঞেস করছিলাম ।”

এমন সময় ঢং ঢং ক'রে বোর্ডিংএর ঘণ্টা বেজে

উঠল। পারুল জিভটা সভয়ে খানিকটা বার ক'রে উর্দ্ধ্বাসে ছুটে পালাল। স্বধার গাড়ীখানাও আজ কি ভাগ্যে কয়েক মিনিট আগে এসে পৌঁছল। স্বধা নিজের বইখাতা গুছিয়ে নিয়ে গিয়ে গাড়ীতে উঠে পড়ল।

সারা পথ গাড়ীতে যেতে যেতে একই কথা সে ভাবতে লাগল। দশ টাকার শাড়ী যা সাত জন্মেও তাকে কিনে দেবেন না। তাঁর নিজেরও বোধহয় দশ টাকা দামের কোনও কাপড় নেই। বিয়ের সময়ের সেই লালপেড়ে গরদখানা ছিল, তা সেখানাও ক্রমাগত প'রে প'রে ছিঁড়ে এসেছে। এক স্বধা যদি নিজে টাকা জমিয়ে কিনতে পারে। কিন্তু কোথা থেকে সে পয়সা জমাবে? সে ত আর বোর্ডিংএর মেয়েদের মত পকেট-মাগি পায় না! ছেলে-মানুষ সে, বিদ্যাবুদ্ধি এত কিছু নেই যে মার্কারি ক'রে বা টুশনি ক'রে টাকা আনবে।

ভাবতে ভাবতেই বাড়ী এসে পৌঁছল। ঝি এবেলাও আসেনি, কাজেই ফিরে এসেই খেতে পাওয়ার বদলে স্বধাকে বাসনের কাঁড়ি নিয়ে নোংরা

## কথা-সপ্তক

কলতলায় ব'সে যেতে হল। দুঃখে এবং শারীরিক ক্লান্তিতে স্খার চোখে জল এসে পড়েছিল, শাড়ীর চিন্তা তার মন থেকে উড়েই গেল।

বাসন মাজা শেষ হতে না হতেই মা খাবার তৈরী ক'রে স্খাকে ডাক দিলেন। গরম গরম পরেটা আর ও-বেলার মাছের তরকারি খেতে পেয়ে স্খার মেজাজটা একটু ঠাণ্ডা হল। খাওয়ার বাসনগুলো চর্চ ক'রে তুলে ধুয়ে দিয়ে, সে শোবার ঘরে গিয়ে ঢুকল।

দু'খানি মোটে তাদের ঘর। একখানিতে স্খারা দুই মায়ে ঝিয়ে শোয়, ছোট খোকাও অবশ্য মায়ের সঙ্গেই থাকে। আর একখানা ঘরে স্খার বাবা আর তার দাদা বিকাশ শোয়। ঐ ঘরেই লোকজন এলে বসে, বিকাশ পড়াশুনোও করে। স্খাদের ঘরে দু'খানা তক্তপোষ, আর ছোট একটা টেবিল, তার উপর স্খার বই, খাতা, দোয়াত, কলম, পেন্সিল সব সাজান থাকে। এক কোণে দেওয়ালের গায়ে ঝোলান আলনাতে তাদের কাপড়-চোপড় থাকে। একটা টুল টেবিলের সামনে

## শীলাস্বামী

সুধার ব'সে পড়বার জন্মে । আর কোনও আসবাব নেই ঘরে । বড় দুটো বাস তক্তপোষের তলায় ঠেলা আছে, হঠাৎ ঘরে ঢুকলেই চোখে পড়ে না ।

অন্য ঘরটায় তক্তপোষ নেই । মাটিতে বিছানা ক'রে সুধার বাবা শোন, বিকাশও তাই শোয় । সকালেই সুধা সে-বিছানাগুলো গুটিয়ে এ ঘরে নিয়ে আসে । ওখানেও ছোট একটা টেবিল আছে, তবে এ ঘরের খানার চেয়ে কিছু বড় । গোটা-তিন চেয়ার আর একটা বেঞ্চি আছে সেখানে, বাইরের কেউ এলে বসে ।

নিজের টেবিলটার সামনে ব'সে ব'সে সুধা উপায় চিন্তা করতে লাগল । সত্যি, এ রকম ক'রে আর পারা যায় না । তেরো পূরে চোদ্দয় পা দিতে চলেছে সে, অথচ এখন পর্যন্ত দু-আনা পয়সা কখনও নাড়া-চাড়া করেনি । মা-বাবা গরীব, কোথা থেকে তাকে দেবেন ? কিন্তু গরীবের মেয়ে ব'লে কি সুধার সখ ব'লেও কোনও জিনিষ নেই, না, স্কুলের মেয়েদের কাছে মান রেখে চলতে তার ইচ্ছা করে না ?

## কথা-সংকল

পাশের বাড়ীর ঊষা এসে ডাকল, “এই সূধা, চল্‌না ভুতিদের ছাদে একটু বেড়িয়ে আসি।”

সূধা উঠে পড়ল। ভুতিদের বাড়ী কাছেই, গলিটা পার হলেই হয়। তাদের মস্ত বাড়ী, ছাদটাও মস্ত। সূধা, ঊষা প্রভৃতি পাড়ার মেয়েরা প্রায়ই বেড়াতে এখানে আসত, কারণ তাদের বেড়াবার আর কোনও জায়গা বড় ছিল না।

ভুতিদের বাড়ী যেমন বড়, তেমনই লোকজনও এক পাল। তার নিজের মা বাবা, ভাই বোনরা ত আছেই, তা ছাড়া নিকট এবং দূর সম্পর্কের আত্মীয়-কুটুম্ব বাড়ী ভর্তি। সূধারা দোতলায় উঠেই শুনল ভুতি ছাদে আছে, তারাও সোজাসুজি উপরে চ’লে গেল।

ভুতি আর তার বোন কুশি ছাদের এক কোণে ধুপ্‌ধাপ্‌ ক’রে খুব স্কিপ্‌ করছিল। সূধাকে ডেকে বললে, “এই লতাপাতা, স্কিপ্‌ করবি ত আয়।”

সূধা বললে, “বাবা, এই ত স্কুল থেকে এলাম, এখন অত ধিন্‌-ধিন্‌ ক’রে লাফাবার ক্ষমতা নেই।”

কুশি বললে, “হ্যাঁ, পড়তে আমার বাবার হাতে ত বুঝতে ঠেলা। স্কুলেই যাও, আর মাটিই কোপাও, সন্ধ্যাবেলা ধিন্-ধিন্ ক’রে নাচতেই হবে। শুনছিস, আবার পরশু থেকে আমাদের ঘুঁসি-লড়া আর লাঠি-খেলা শেখাবার মাফটার আসছে। তোরা কেউ শিখবি?”

উষা বললে, “আমরা ত আর পণ্টনের সেপাই হব না, ও-সব শিখে কি হবে? বরং গান-বাজনা কি ছবি-অঁকা হলে শিখতাম।”

ভূতির দৌড়ধাপ, মারপিট বেশ ভাল লাগে। বাড়ীর সকলে তাকে ‘মদা ভগবতী’ ব’লে ক্ষ্যাপায়, কেবল তার বাবা ছাড়া। তাঁর এ-সবে ভারি উৎসাহ। তিনিই জোর ক’রে মেয়েদের লাঠি-খেলা ইত্যাদি শেখাবার ব্যবস্থা করছেন।

কুশির ও-সব কিছু ভাল লাগে না, তার ভাল লাগে ছবি-অঁকা, কাপড়ে ফুল তোলা—এই সব; কিন্তু বাবা সে-সব কথায় কানই দেন না। ছেলে নেই ব’লে, মেয়েদেরই ছেলের মত ক’রে মানুষ করতে তিনি ব্যস্ত।

## কথা-সপ্তক

তাই উষার কথায় কুশি বললে, “হাঁ, শেখাচ্ছে গান-বাজনা ! বলে একটা শেলাইয়ের টীচারের জন্যে চেষ্টিয়ে চেষ্টিয়ে মুখে রক্ত উঠে গেল, কিন্তু কিছুতেই যদি বাবা কথাটা কানে তুললেন। বেশী চেষ্টালেই বলেন, ‘নিজেরা নেনা জোগাড় করে’।”

হঠাৎ সুধার মাথায় একটা বুদ্ধি খেলে গেল। আচ্ছা, সে ত বেশ ভাল শেলাই জানে। প্রত্যেক-বার ক্লাশের শেলাইয়ের প্রাইজটা ত সে পায়ই, তা ছাড়া একবার মেলাতে মেডেল শুদ্ধ পেয়েছে। সে কি কুশিকে শেলাই শেখাতে পারে না? বলে দেখবে নাকি? তারা যদি সুধাকে পাঁচ টাকা ক’রেও মাইনে দেয়, তা হলেও সুধার কত কাজে লাগে।

খানিকক্ষণ ইতস্ততঃ ক’রে সে কুশিকে ছাদের একধারে ডেকে নিয়ে গিয়ে বললে, “ভাই, আমি তোকে শেলাই বেশ শেখাতে পারি। আমি উলবোনা, এম্ব্রয়ডারি, কাটছাঁট্ সব শিখেছি। আমাকে টীচার রাখবি?”

কুশি খানিকক্ষণ হাঁ ক’রে থেকে বললে, “তুই



হলে ত ভালই হয়, কিন্তু তুই কখন শেখাবি ?  
স্কুল থেকে ফিরতেই ত তোর সন্ধ্যা হয়ে যায় ।”

সুধা বললে, “শনি-রবিবারে আসব, দু’ঘণ্টা  
ক’রে চার ঘণ্টা শেখাব হুঁয়ায় । তাহলেই  
ত হবে ?”

কুশি বললে, “আচ্ছা, চল্ মাকে জিজ্ঞেস ক’রে  
আসি ।”

কুশির মা তখন ঠাকুরকে কি কি রান্না হবে  
তাই বুঝিয়ে দিচ্ছিলেন । কুশি তাঁর কথায় বাধা  
দিয়ে চঁচিয়ে বললে, “মা, সুধাকে আমি শেলাইয়ের  
টীচার রাখব । ও খুব ভাল শেলাই জানে, সেবারে  
মেলায় মেডেল পেয়েছে ।”

কুশির মা হেসে সুধার দিকে চেয়ে বললেন,  
“হ্যাঁ মা লক্ষ্মী, তুমি পারবে ? তোমার সময়  
কখন হবে ?”

সুধা মুখ নীচু ক’রে বললে, “আমি শনিবারে  
আর রবিবারে দুপুর বেলা আসব ।”

কুশির মা বললেন, “আচ্ছা, সে বেশ হবে ।”  
কুশি সুধাকে টেনে নিয়ে আবার ছাদে চ’লে গেল ।

## কথা-সপ্তক

আরও খানিকক্ষণ গল্পগুজব ক'রে সুধা বাড়ী চ'লে গেল। মাইনের কথা যদিও কিছু হল না, তবু সুধা মনে মনে জানুল, ওঁরা শুধু শুধু তাকে খাটাবেন না, মাইনে নিশ্চয়ই কিছু দেবেন।

প্রথম শনিবারে সে যখন কুশিদের বাড়ী গেল, তখন ভুতি ছুটে এসে তার হাত ধ'রে বললে, “আসুন আসুন টীচার মশায়, আপনার ছাত্রী ঐ ঘরে ব'সে আছে।”

সুধার একটু লজ্জা হল, সবাই হয়ত তাকে খুব বেশী অদ্ভুত ভাবছে। কিন্তু যখন এসেছেই, তখন পিছলে চলবে না। ঘরে ঢুকে তাড়াতাড়ি শেলাইয়ের সরঞ্জাম টেনে নিয়ে ব'সে গেল। কুশিরও এ দিকে মন খুব, তাকে শেখাতে সুধার কিছুই কষ্ট হল না। সময়টা দেখতে দেখতে কোথা দিয়ে যে কেটে গেল, তারা টেরই পেল না। ফিরে আসবার সময় কুশির মা তাকে জলখাবার না খাইয়ে ছাড়লেন না, বেশ ক'রে খেয়ে-দেয়েই সে বাড়ীতে ফিরল।

আসবার সময় সিঁড়িতে ভুতির মা ব'লে দিলেন,

“দেখ সূধা, তোমার মাকে ব’লো যে আমরা তোমায় মাসে মাসে দশ টাকা ক’রে হাত-ধরচের জন্যে দেব।”

সূধা অত্যন্ত খুসি হয়ে বাড়ী ফিরে এল। দশ টাকা ক’রে পেলে তার যে কত কাজ হয়, তার ঠিকানা নেই।

মাসটা কেটে গেল। প্রথম উপার্জনের টাকা হাতে পেয়ে তার যে কি রকম আনন্দ হ’ল তা আর বলবার নয়। টাকাটা নিয়ে এসে সে মায়ের হাতেই দিল। তিনি সেটা তাকে ফিরিয়ে দিয়ে বললেন, “তুমি রাখ মা, তোমার পছন্দমত কোনও জিনিষ কিনো।”

সূধা টাকাটা নিজের কাপড়ের বাস্কে রেখে দিল। পরের মাসেই তার জন্মদিন। নীলাম্বরী কাপড় সে স্বচ্ছন্দে কিনতে পারবে। দশ টাকা ত তার রইলই, তা দিয়ে শাড়ী হবে, মা কি আর একটা ভাল জামা তাকে দেবেন না? পারুলকে ঐ রকম শাড়ী একখানা জুটিয়ে দেবার জন্যে ব’লে রাখবে কি না, তাই সূধা ভাবতে লাগল।

## কথা-সপ্তক

জন্মদিন হতে আর সপ্তাহ-খানেক বাকি । সকাল বেলা সুধা শোবার ঘরের সামনের সরু বারান্দাতে দাঁড়িয়ে বড় রাস্তার লোক-চলাচল দেখছিল । এই জায়গাটিই তার বাড়ীর মধ্যে সব চেয়ে প্রিয় ছিল ।

রাস্তা দিয়ে মস্ত বড় একটা গানের দল চলেছে, কি যে গানের কথাগুলো, সুধা প্রথমে বুঝতে পারল না । কিন্তু অতগুলি মানুষের বেদনামাথা গলার স্বর তার মনটাকে কেমন যেন চঞ্চল ক'রে তুলতে লাগল । কি চায় ওরা ? কেন অমন ক'রে গান গাইছে ?

গানের দল ক্রমে তাদের গলির মধ্যে এসে পড়ল । প্রত্যেক বাড়ীর বারান্দা, জান্নার ধার, মানুষে ভ'রে উঠল, ছোট ছেলে-মেয়েরা দৌড়ে গলিতে নেমে গেল । সুধা যেখানে ছিল, সেই-খানেই দাঁড়িয়ে রইল । সে এতক্ষণে ব্যাপারটা বুঝতে পেরেছে । বাংলা-দেশের অনেকগুলি জেলা বানের জলে ভেসে গেছে, সেখানকার মানুষ না খেয়ে মরছে, কাপড়ের অভাবে গলাজলে

দাঁড়িয়ে থাকছে, দুঃখে-কষ্টে মা ছেলে ফেলে  
পালাচ্ছে, বাপ আত্মহত্যা ক'রে মরছে। এদের  
জন্যে এই গানের দল দেশবাসীর করুণা ভিক্ষা  
করতে বেরিয়েছে।

যে যা পারে দিতে লাগল। টাকা, পয়সা  
পুরনো কাপড়। সুধাও নিজের বাক্সটা একবার  
খুলল, তারপর আন্তে আন্তে নীচে নেমে গেল।

ফিরে যখন উপরে এল, মা জিজ্ঞেস করলেন,  
“কি দিলি রে?”

সুধা একটুক্ষণ চুপ ক'রে থেকে বললে, “সেই  
দশ টাকার নোটটা।”

মা ব্যস্ত হয়ে বললেন, “সে কি রে? সব দিয়ে  
দিলি? কিছু রাখলি না!”

সুধা বললে, “না মা, দশ টাকায় অন্ততঃ দশ-  
জন মানুষ ত কাপড় পরতে পারবে? আমি না  
হয় জন্মদিনে পুরনো কাপড়ই পাব।”

# চীনে বুদ্ধি

( স্প্যানিশ্ গল্প অবলম্বনে )

চাওসির ভারি দুর্দিন এসে পড়েছিল ।  
কিন্তু তাঁর ধানের ক্ষেতে ফসল হয়েছিল প্রচুর,  
চায়ের বাগানে চায়ের সাদা ফুলে ডালপালা  
সব ঢাকা প'ড়ে গিয়েছিল, রেশমের গুটি যা  
হয়েছিল, তার চেয়ে ভাল ও-দেশে কারও ছিল  
না । সম্রাটের হাতে লেখা একখানা চিঠি পর্যন্ত  
তিনি পেয়েছিলেন, তাতে চাওসি যে বহুকাল  
বেঁচে থাকবেন, তার ইঙ্গিত ছিল । সব চেয়ে  
স্বথের কথা এই যে, তাঁর পরম শত্রু পিকং, যে  
চাওসির বিনুনী কেটে ফেলে মারাত্মক অপমান  
করেছিল, তাকে অল্প আগেই ঘাতকে কেটে কুচিয়ে  
ফেলেছে, এ তিনি নিজের চোখে দেখে এসেছেন ।

তবু তাঁর দুর্দিন কেন, তোমরা জিজ্ঞেস করতে  
পার । তা বলা শক্ত । কিন্তু দুর্দিন যে এসেছিল  
তা ঠিকই, নইলে তিনি অপদেবতা ফোর চীনেমাটী

## চীনে বুদ্ধি

দিয়ে গড়া মূর্তিটাকে ক'সে ঠ্যাঙাতে হুকুম করবেন কেন ? সেটা ত ভেঙে মাটিতে গড়াচ্ছিল। চাওসি নিজের বুড়ো রাধুনীকে আচ্ছা ক'রে বকুনি দিলেন, যদিও তাঁর অতিথিরা বুড়োর রান্না খেয়ে ধন্য ধন্য করছিল। এক পেয়লা বহুমূল্য স্তূগন্ধি চা রাগ ক'রে ফিরিয়ে দিলেন, এমন কি তাঁর পোষা বাঁদরটা এসে যখন তাঁকে আদর করতে লাগল, তখন তাকে ঠেলা মেরে সরিয়ে দিলেন।

তাঁর তিনটি অতিথি বসবার ঘরের মাঝখানে আসন-পিঁড়ি ক'রে বসেছিলেন। খাওয়া হয়ে যাবার পরে তাঁদের সম্বোধন ক'রে চাওসি বললেন, “বন্ধুগণ, আপনারা জানেন যে, আমি আমার ছেলেকে মহামহিম সত্ৰাটের দরবারে হাজির করতে ইচ্ছা করি।”

সত্ৰাটের নাম হবামাত্র বক্তা এবং শ্রোতা সকলেই মাথা নুইয়ে প্রায় মেঝেতে ঠেকিয়ে ফেললেন, এবং বাঁদরটাও তাঁদের দেখাদেখি ঠিক সেই রকম করছিল ব'লে, তাকে বসবার ঘর থেকে দূর ক'রে দেওয়া হল।

## কথা-সপ্তক

চাওসি আবার বলতে লাগলেন, “আমার ছেলে টিকু মোটেই মানুষ হচ্ছে না, যদিও তাকে আমি খুব ভাল শিক্ষা দিচ্ছি। কি রকম ক’রে আঠারবার ঝুঁকে প’ড়ে নমস্কার করতে হয়, তা সে জানে না, আমাদের সভ্য-সমাজের সনাতন অপরিবর্তনীয় রীতিনীতিও কিছু বোঝে না। লিসিংএর গুণবতী মেয়ে, যার পা দু’খানি বাদামের খোলায় ধ’রে যায়, তাকে কি না সে বিয়ে করতে নারাজ। আর তোমরা শুনে অবাক হবে যে চণ্ড, যখন তাকে দ্বন্দ্ব-যুদ্ধে আহ্বান ক’রে বললে যে, সে নিজের পেট কেটে ফেলতে পারে না, তখন টিকু মোটেই এগোল না। চণ্ড দিব্যি তার সামনে হাসতে হাসতে নিজের পেটে তলোয়ার ঢুকিয়ে দিয়ে মারা গেল। এর চেয়ে কলঙ্কের কথা আর কি আছে? এখন পরিবারের মান রাখবার জন্যে আমার কি করা উচিত, তোমরা ভেবে-চিন্তে বল। তোমরা যা স্থির ক’রবে, আমি সেই অনুসারে কাজ করব।”

অতিথিদের মধ্যে যঁার বয়স সব চেয়ে বেশী,



## ঐশ্বৰ্য্য

তিনি বললেন, “প্রথমতঃ টিকুকে তোমার ত্যজ্যপুত্র  
করা উচিত।”

দ্বিতীয় ব্যক্তি বললেন, “আমরা পাঁচজন  
যে তোমার আত্মীয়-স্বজন আছি, তাদের মধ্যে  
তোমার সম্পত্তি ভাগ ক’রে দেওয়া উচিত।”

তৃতীয় জন বললেন, “আমরা সব একগোষ্ঠীর  
লোক, তোমার ছেলের কলঙ্কে আমাদের সকলের  
কলঙ্ক হয়েছে। এর প্রায়শ্চিত্তের জন্যে তোমার  
গলায় দড়ি দিয়ে মরা উচিত, না হলে গোষ্ঠীর মান  
থাকে না।”

এই ব’লে আত্মীয়-বন্ধুরা বিদায় হলেন। তাঁদের  
ডেকে এনে পরামর্শ চাওয়ার জন্যে চাওসি এখন  
মনে মনে অনুতাপ করতে লাগলেন।

বিকেল বেলা তিনি তাঁর ছোট স্ত্রী টীয়ানের  
কাছে গিয়ে উপস্থিত হলেন; তাঁর হাতে একটি  
হাতীর দাঁতের বাক্স, তাতে নানা রকম সুন্দর ছবি  
আঁকা।

তাঁর স্ত্রী খুসি হয়ে জিজ্ঞেস করলেন, “আমার  
জন্যে কি নিয়ে এসেছ?”

## কথা-সংকল

চাওসি বললেন, “এমন জিনিষ যে দেখলে একেবারে অবাক হয়ে যাবে।”

টীয়ান শুনে ব্যগ্রভাবে তাড়াতাড়ি বিছানার উপর উঠে বসলেন। চাওসি বাক্সটা বিছানার উপর নামিয়ে রেখে বললেন, “তুমি আদর্শ স্ত্রী ছিলে এবং ইতিহাসে যাতে পরম গুণবতী বলে তোমার নাম থাকে, আমি তার ব্যবস্থা করতে চাই। আমার পরিবারের মান বজায় রাখার জন্যে একটি বলি দরকার। আমাকে ত মহামহিম সম্রাট্ অনেক কাল বাঁচবার অঙ্গীকার পত্র লিখে দিয়েছেন, কাজেই আমি জোর ক’রে ম’রে তাঁর প্রতি অসম্মান দেখাতে পারি না। সুতরাং আমি ঠিক করেছি, তোমার উপরেই এই গৌরবজনক কাজের ভার দেব। এই বাক্সের মধ্যে এক গাছা রেশমের দড়ি পাবে। ওটা গলায় দিয়ে ম’রে তুমি আমাদের মান রক্ষা কর।”

টীয়ান্ অত্যন্ত ভয় পেয়ে বললেন, “প্রভু, আমি অত্যন্ত ভীতু, নিজেকে নিজেকে মারতে কিছুতেই পারব না।”



চাওসি বললেন, “এমন জিনিষ যে দেখলে একেবারে অবাক হয়ে যাবে।”



## ঈশানে বুদ্ধি

চাওসি তাঁকে সাহায্য দিতে বললেন, “ভয় পেয়ো না। যদি নিজেকে না পার, তা হলে বুড়ো রাঁধুনিটাকে ডেকে, সে তোমায় সাহায্য করবে।” এই বলে তিনি ঘর থেকে বেরিয়ে গেলেন।

ঈশান্ বুড়ো কিন্কে ডেকে পাঠালেন। সে অত্যন্ত ভয়ে ভয়ে এসে হাজির হল।

ঈশান্ বললেন, “তোমার একটু বিশ্রাম দরকার।”

কিন্ চোখ রগড়াতে রগড়াতে বললে, “আমার রাত্রে মোটে ঘুম হয় না।”

ঈশান্ বললেন, “তুমি খুব গুণের চাকর। পরলোকে তোমার জন্যে যে পুরস্কার অপেক্ষা করে আছে, তা পাবার জন্যে নিশ্চয়ই তুমি ব্যস্ত আছ ?”

কিন্ বললে, “বুদ্ধদেব আমার জন্যে কি ব্যবস্থা করেছেন, তা ত জানি না ঠাকরন্।”

ঈশান্ বললেন, “তা দেখ, তোমায় একটা কাজের জন্যে ডেকেছি। আমার স্বামীর আদেশে আমাকে গলায় দড়ি দিয়ে মরতে হবে। পরলোকে

## কথা-সংকলন

একেবারে একলা কি ক'রে যাব ভেবে ভয় পাচ্ছি।  
তুমিও যদি আমার সঙ্গে এস, তা হলে ভাল হয় ;  
একজন চেনাশোনা বিশ্বাসী লোক কাছে থাকে।  
এখানে ত কর্তা তোমার উপর সন্তুষ্ট নন, সেদিন  
তোমার রান্না ঠেলে সরিয়ে দিলেন। এখানে থেকে  
কি ক'রবে ?”

কিন্ বেচারার ছোট ছোট চোখ ভয়ে বড় হয়ে  
উঠল। টীয়ান বললেন, “ভেবে দেখ। ওখানে  
ভালই থাকবে। রাজি হও যদি, তা হলে এই  
দড়িটা নিয়ে ঝুলে পড়। আমি নিজের গহনাগাঁটি  
নিয়ে আসছি, তারপর গলায় দড়ি দেব।”

কিন্ কিছু বলে না দেখে, টীয়ান্ বাক্স থেকে  
রেশমের দড়িটা বার ক'রে, তার গলায় ঝুলিয়ে  
দিলেন। বললেন, “আচ্ছা, ঐ জানলার বাইরে  
গিয়ে গরাদেতে বেঁধে ঝুলে পড়। আমিও এলাম  
ব'লে।”

কিন্ ঘর থেকে বার হয়ে যেতে যেতে, বাইরের  
বারান্দায় একটা শব্দ শুনতে পেল। “বান্দরটা  
জিনিষপত্র উণ্টোচ্ছে”—ব'লে কিন্ এগিয়ে চলল,

## ভীমে বুদ্ধি

আর মনে মনে ভাবতে লাগল, “আমার দুই কারণে আত্মহত্যা করা উচিত নয়। এক ত ম’রে আর জন্মাব কিনা তার কোনও ঠিকানা নেই। দ্বিতীয়তঃ, আমি প্রভুর আদেশে সেদিন অপদেবতা ফোর মূর্তি ঠেঙিয়ে ভেঙেছি। পরলোকে আমায় হাতে পেলে হয়ত সে শোধ তুলবে। কাজ নেই বাবা, সেখানে গিয়ে, বেশ আছি”—এই ব’লে সে গলা থেকে ফাঁশটা খুলে ফেলল।

বারান্দায় আবার শব্দ হ’ল। কিন্ যদিও পোষা বাঁদরটার ঘাড়ে দোষ চাপাচ্ছিল, কিন্তু সে বেচারার কোনও দোষ ছিল না। চাওসির গুণবান্ ছেলে টিকু বাপের লোহার সিন্ধুক খুলে ধনরত্ন সব চুরি করছিলেন, তারই এই শব্দ। পাশের জান্নাটা খোলা ; এটা বেয়ে নাম্লে, একেবারে বাগানের মধ্যে নেমে পড়া যায়। একটা বেশ বড় থলি মণি-মুক্তায় বোঝাই হয়ে উঠেছিল। থলির ভিতর থেকেও সেগুলি ঝক্ ঝক্ ক’রে জ্বল্ছিল।

কিন্ অনেক কালের পুরনো চাকর। সে এই ব্যাপার দেখে অত্যন্ত চ’টে গেল এবং টিকুকে

## কথা-সপ্তক

বক্তে আরম্ভ করলে, “একে ত ভীকৃতার জন্মে বাপের বংশে কালি দিয়েছ, তার উপর আবার চুরি !”

টিকু বললে, “আরে চুপ কর, এখনই কেউ শুনতে পাবে।” কিন্তু কিনের একবার মুখ ছুটেছে, আর কি সে থামে ? সে আরও জোরে চ্যাচাতে লাগল।

তখন টিকু বেজায় ভড়কে গেল। বললে, “আচ্ছা, রেশমের ফাঁসটা আমায় দাও। পরিবারের নামে কলঙ্ক যখন আমিই দিয়েছি, তখন মরা উচিত আমারই।”

কিনের আপত্তি ছিল না, সে তাড়াতাড়ি রেশমের দড়িটা টিকুর গলায় পরিয়ে দিল। দড়ির একটা দিক জানলার গরাদের সঙ্গে বেঁধে টিকু ঝুলে পড়তে চলল। কিন্তু প্রথমে ধনরত্নের বোঝাটা কাঁধে ফেলে নিল। কিন্ অবাক হয়ে গিয়েছে দেখে বললে, “অনেক দূরের পথ, খরচার জন্মে কিছু সঙ্গে নিতে হবে ত ?”

কথাটা কিনের ঠিক বিশ্বাস হল না। যা হোক



## চীনে বুদ্ধি

সে কিছু বলল না। টিকু জানলার উপর উঠে বসে বললে, “তুমি এখান থেকে চলে যাও, আমার মৃত্যু-যন্ত্রণা দেখলে, তোমার ভয়ানক কষ্ট হবে।”

কিন্ সিঁড়ি দিয়ে নেমে নীচে চলল। বাগানে ঢুকতে যাবে, এমন সময় দরজার কড়া নাড়ার একটা বিকট শব্দ আর একটা যন্ত্রণাসূচক চীৎকার শুনতে পেল। তার একটু সন্দেহ হল। গলায় দড়ি দেবার ভান করে, ছোকরা শেষে ধনরত্ন নিয়ে চম্পট দিল নাকি? কিন্ তাড়াতাড়ি বাগানে গিয়ে ঢুকল।

জানলার থেকে একটা দেহ ঝুলছে, সে দেখতে পেল। নীচে মাটিতেও কি একটা যেন নড়ছে, কিন্ ঠিক বুঝতে পারল না। যাই হোক, নিজের ঘাড়ে হাত বুলাতে বুলাতে সে ভাবলে, “যাক্ হতভাগা মরেছে! টিয়ান্-ঠাকরুন্কে ত আর একলা পড়তে হবে না, সতীনপো গিয়ে জুটল ব’লে।”

সে নিজের ঘরে গিয়ে দিব্যি ক’রে আফিং টেনে ক’ষে ঘুম দিল।

## কথা-সপ্তক

পরদিন সকালে, চাওসির বাড়ী আত্মীয়-স্বজন বন্ধু-বান্ধবে ভ'রে গেল। সকলের পরণে শাদা পোষাক, এইটাই চীনদেশে শোকের চিহ্ন। সকলে চাওসির মৃতদেহের কাছে শেষ উপহার দিতে এসেছেন। কিন্তু চাওসি নিজেই যখন শাদা পোষাক প'রে, গম্ভীর মুখে তাঁদের সামনে এসে দাঁড়ালেন, তখন তাঁরা একেবারে অবাক হয়ে গেলেন। একজন অত্যন্ত চ'টে বললেন, “তুমি বেঁচেই আছ? হায়, হায়, আমাদের আর মান থাকল না।”

চাওসি তখন সব কথা খুলে বললেন। সত্ৰাট্ তাঁকে বাঁচবার অঙ্গীকার-পত্র লিখে দিয়েছেন, তিনি কি ক'রে মরতে পারেন? স্ত্রীকে বলেছিলেন, সে ভয়ে মরতে পারল না। বুড়ো কিনের দ্বারাও কাজ হল না, শেষে তাঁর অপরাধী ছেলে স্বেচ্ছায় গলায় দড়ি দিয়ে, সব গোলমাল চুকিয়ে দিয়েছে। আত্মীয়-বন্ধুরা অনেকক্ষণ ধ'রে তর্ক-বিতর্ক করলেন, পরে ঠিক হল যে, টিকু মরলেই চলবে।

তখন চাওসি আত্মীয়দের বললেন, “এস,



বেশমের দড়ি গুলার দিয়ে একটা দেহ বুলছে বটে কিন্তু  
দেহটা একটা বাদরেরঃ



## চীনে বুদ্ধি

বাগানে যাওয়া যাক। সেখানে এখন পর্যন্ত কেউ যায় নি। আমরা হতভাগ্য টিকুর মৃতদেহ নামিয়ে আনুব।”

সকলে সার বেঁধে তাঁর পিছন পিছন চললেন। কিন্তু ঘটনাস্থলে উপস্থিত হবামাত্র সবাই একেবারে অবাক হয়ে গেলেন। রেশমের দড়ি গলায় দিয়ে একটা দেহ ঝুলছে বটে, কিন্তু দেহটা একটা বাঁদরের।

চাওসি বিস্মিত হয়ে বললেন, “এ আমার ছেলে নয়।”

কিন্কে ডাকা হল। সে এসে বললে, “প্রভু, আমি নিজের চোখে দেখলাম, তিনি দড়ি গলায় দিলেন। নিশ্চয় এই বাঁদরটা আপনার ছেলের রূপ ধরেছে, আর নিজের দেহটা এখানে রেখে গেছে। এখানে কোনও একটা মায়ামন্ত্রের কাণ্ড চলেছে। ফো এমনি ক’রে প্রতিশোধ নিচ্ছে বোধ হয়, তাঁর মূর্তি আপনি ঠেঙিয়ে ভেঙেছেন কিনা।”

টিকু মারা গেলে চাওসির উত্তরাধিকারী হন

## কথা-সপ্তক

আত্মীয়েরা, কারণ চাওসির আর ছেলে-পিলে নেই। তাঁরা একবাক্যে ব'লে উঠলেন, “মোটাই তা নয়। এই ত টিকু! দেখছ না বাপের চেহারার সঙ্গে কি আশ্চর্য্য সাদৃশ্য?”

চাওসি অত্যন্ত চ'টে বললেন, “আমার চেহারার সঙ্গে সাদৃশ্য? ওর মুখ-খানা দেখ দেখি ভাল ক'রে?”

আত্মীয়েরা আবার একবাক্যে ব'লে উঠলেন, “অবিকল তোমার মত মুখ, চাওসি।”

চাওসি বললেন, “ওর কান-ছুটো দেখ।”  
আত্মীয়েরা বললেন, “ঠিক তোমার মত।”

চাওসি আবার গোলমাল করবার উপক্রম করতেই, একজন তাঁর কানে কানে বললেন, “একজনের মরা ত দরকার? কেন মিছে গোলমাল করছ? চুকে যেতে দাও না?”

চাওসি অবশেষে বাধ্য হয়ে স্বীকার করলেন যে দেহটা তাঁর ছেলেরই, যদিও দেখতে অনেকটা খারাপ হয়ে গিয়েছে।

টিকু মারা গিয়েছে ব'লে সরকারি অফিশ্

## চীনে বুদ্ধি

থেকে লিখে দেওয়া হল। বাঁদরের দেহটা নিয়ে বিপুল সমারোহ করে কবর দেওয়া হল। আত্মীয়-বন্ধু সকলেই স্বীকার করলেন যে পরিবারের মান-রক্ষা হয়েছে, আর কোনও কলঙ্ক নেই।

চাওসিকে যদিও মহামহিম সত্ৰাট, দীর্ঘ জীবন উপভোগ করবার অনুমতি দিয়েছিলেন, তবুও তিনি আর খুব বেশী দিন বাঁচলেন না। তাঁর মৃত্যুর পর একটি যুবক এসে তাঁর সম্পত্তি দাবী করল। সে বললে, তার নাম টিকু, এবং সে কয়েক বছর আগে জানলা বেয়ে বাপের বাড়ীর থেকে পালিয়ে গিয়েছিল।

আত্মীয়েরা কেউ তাকে টিকু বলে মানতে চায় না, শেষে আদালতে মোকদ্দমা শুরু হল। দুই পক্ষের বক্তব্য শুনে একজন বিচারপতি এই রায় দিলেন :—

“টিকুর মৃত্যু হয়েছে বলে সরকারি আদালত থেকে লিখে দেওয়া হয়েছে। এই যুবক যে-দিন চাওসির . বাড়ী থেকে পালিয়েছিল বলে বলছে, সেই দিন কেবলমাত্র একটা বাঁদর ঐ বাড়ী

## কথা-সপ্তক

থেকে পালিয়েছিল ব'লে জানা যায় । সে বাঁদরটা কোথায় গিয়েছে, কেউ তা জানে না । যদি এই যুবক উক্ত রাত্রে চাওসির বাড়ী থেকে সত্যি পালিয়ে থাকে, তা হলে এ সেই বাঁদর, আর কেউ নয় । আর এ যদি মিথ্যা কথা ব'লে থাকে, তা হলে সেই অপরাধে একে গলায় দড়ি দিয়ে ঝুলিয়ে দেওয়া হবে ।”

টিকু বেচারা দেখলে, উভয় সঙ্কট । ফাঁসী যাওয়ার চেয়ে সে নিজেকে বাঁদর ব'লেই মেনে নিল । একটা বাঁদর-নাচওয়ালার কাছে কয়েক টাকা নিয়ে তার আত্মীয়েরা টিকুকে বিক্রী ক'রে দিলেন । তারপর তাঁরা মনের আনন্দে চাওসির সব সম্পত্তি উপভোগ করতে লাগলেন ।



## মাটির মায়া

ভরস্ফিণী ব'লে মস্ত বড় এক নদী, তার ধারে ছোট একখানি গ্রাম। নিতান্তই ছোট, বড় জোর একশ' ঘর লোকের বাস। তার ভিতর অধিকাংশই গরীব—চাষী, ক্ষেতের ফসল, বাগানের তরিতরকারির উপরেই তাদের নির্ভর। এদের ভিতর এমন অনেক মানুষ আছে, যাদের চুলে পাক ধরেছে, অথচ তারা সহর কি-রকম তা চোখে দেখেনি, রেলগাড়ী কি জিনিষ, তা জানেও না, বর্ণনা ক'রে বুঝিয়ে বলতে গেলে হাঁ ক'রে চেয়ে থাকে।

এই গ্রামে একটি মেয়ে থাকে, তার নাম অমলা। মা, বাবা বা ভাই-বোন বলতে তার কেউ নেই। অনেক বছর আগে এক ভীষণ মহামারীতে গ্রামের অর্ধেক লোক মারা যায়, সেই সময় অমলারও আত্মীয়-স্বজন যে কেউ ছিল, সকলেই

## কথা-সপ্তক

চ'লে যায়। সে শুধু বেঁচে আছে, তাদের ছোট বাড়ীটিতে। গ্রামেরই এক বুড়ী রাত্রে এসে তাকে আগ্লাম, সারাটা দিন অমলার একলাই কেটে যায়। কিন্তু সময় কাটাবার জন্যে তাকে ভাবতে হয় না। সুন্দর একটি বাগানের মধ্যে তার কুঁড়েখানি, মাটির দেওয়াল, সোনালী রঙের খড় দিয়ে ছাওয়া। বাগানের চারদিক ঘিরে বাঁশের বাখারির বেড়া, কিন্তু বাখারি একখানিও দেখবার জো নেই, ঝুমকো লতায় তার সর্ষটাই ঢাকা। দূর থেকে দেখলে মনে হয়, চারধার জুড়ে ফুলের পরদা দোলান রয়েছে। ঘরের সামনে ফুলের বাগান, পিছনে তরি-তরকারির বাগান। এই-সবের তদারক করতে অমলার সারাটা দিন কেটে যায়, মন ভার করে ব'সে থাকবার কোনই অবসর সে পায় না। এতেই তার খাওয়া-পরাও চলে, পাড়া-গাঁয়ে খরচই বা কি? ভিন্গাঁয়ের ব্যাপারীরা এসে ফুল-ফল-তরকারি সব নগদ দাম দিয়ে কিনে নেয়, দূরের সহরে গিয়ে চড়া দামে সব বিক্রী করে। অমলার দরকার মত গ্রামের হাট থেকে সে ছাল-

## মাটির মায়া

ডাল-মশলা কেনে, তাঁতির কাছে মোটা সূতোর হাতে-বোনা রঙীন শাড়ী কেনে, আবার ছুঁচার পয়সা গরীব-দুঃখীকে দানও করে। বিলাসিতা কাঁকে বলে সে জানেই না, কাজেই তার অভাবে দুঃখও করে না। হাতে, গলায়, চুলে ফুলের মালা ছুলিয়ে সে যখন বাগানে ঘুরঘুর করে বেড়ায়, তখন বনদেবীরাও তার রূপ দেখে হিংসা করেন, মণিমুক্তার গহনা পরা রাজকন্যাও তার সৌন্দর্যের কাছে হার মানেন।

দিন কেটে যায়। গ্রামের জীবনযাত্রায় বৈচিত্র্য কিছু নেই, তবু এটা গ্রামের লোকের কাছে একঘেঁয়ে লাগে না, তারা চিরকাল এতেই যে অভ্যস্ত? নূতন ধরণের কিছু তারা চায় না, তাদের এই শান্তিময় জীবনই তাদের সব চেয়ে ভাল লাগে।

হঠাৎ এক সন্ধ্যাবেলা গ্রামে সাড়া পড়ে গেল। ছিদাম তাঁতির চোদ্দ-পনেরো বছরের মেয়েকে পাওয়া যাচ্ছে না। সন্ধ্যার সময় একলা সে নদীর ঘাটে জল আনতে গিয়েছিল, তারপর আর কেউ

## কথা-সপ্তক

তাকে চোখে দেখেনি। গ্রামে হুলস্থূল পড়ে গেল। কি হল মেয়ে, কোথায় গেল? এ গাঁয়ে কেউ কারো দুঃখ নেই, সবাইকার সঙ্গে সবাইকার ভাইয়ের মত সম্বন্ধ, এখানে একজন আর-একজনের অনিষ্ট করবে কেন? আর কিসের জন্মেই বা করবে? ছিদাম গরীব মানুষ, তার মেয়ের গায়ে কিছু সোনাদানা নেই। কিসের লোভে মানুষ তার ক্ষতি করবে?

গ্রামের লোক যথাসাধ্য খোঁজাখুঁজি করলে, গ্রামের চৌকিদারকেও খবর দেওয়া হল, কিন্তু ফল কিছু হল না। মেয়েটি মামার বাড়ী যেতে খুব ভালবাসত, সেখানেও লোক গেল খোঁজ করতে, সেখানে সে যায়নি। দিনের পর দিন কেটে চলে, তারপর কখন একদিন লোকে ছিদামের মেয়ে পার্বতীর কথা ভুলে গেল। সংসারের নিয়মই এই যে এখানে কোনও কথাই মানুষে বেশী দিন মনে রাখেনা।

কয়েকটা মাস কেটে গেছে, শীতকাল চলে গিয়ে বসন্তকাল এসে পড়েছে। ফুলের গন্ধে বাতাস

## মাটির মায়া

ভরপুর, নূতন পাতার সবুজ রঙে চোখ যেন জুড়িয়ে যায়। পাখীরা ঝাঁক বেঁধে যেন দেশ বেড়িয়ে বাড়ী ফিরেছে, তাদের মিষ্টি সুরে সমস্ত দিক্ যেন উৎসবময় হয়ে উঠেছে।

দোল-পূর্ণিমায় গ্রামে ভারি আনন্দ, এইটাই তাদের সব চেয়ে বড় পর্ব। সেদিন ছেলে-বুড়ো, স্ত্রী-পুরুষ কেউ ঘরে থাকে না। আবীরের রঙে গ্রামের পথের ধূলা রাঙা হয়ে ওঠে, রঙে রঙে সব-ক'টি মানুষের কাপড়-চোপড়ের যা শ্রী হয়, রামধনুও তার কাছে হার মেনে যায়। ফুলের শোভা সেদিন শতগুণ বেড়ে ওঠে, পাখীর কণ্ঠে সেদিন সুরের ঝরণা নেমে আসে। খাওয়া-দাওয়ার কথা কেউ মনেও করে না, বাড়ীর দিকে কেউ ফিরেও তাকায় না। সূর্য ডুবতে না ডুবতে সোনার থালার মত মস্ত বড় চাঁদ আকাশে আবার আলোর বান ডাকিয়ে উঠে আসে, ঘরে যাবার কিই বা দরকার? রাতটাও প্রায় নৃত্যগীতের উৎসবেই কেটে যায়।

পূর্ণিমার রাত্রি-শেষে উৎসব-ক্লান্ত শরীর নিয়ে

## কথা-সপ্তক

অমলা তার ঘরে ফিরে যাচ্ছিল। একটু ঘুম তার নিতান্ত দরকার। পূবের দিকে চেয়ে দেখলে, আকাশ ঝিনুকের বুকের মত স্বচ্ছ আলোর ভ'রে উঠছে, সকাল হতে খুব বেশী আর দেরি নেই। এখন কি আর ঘুমনো চলবে? কাল সারাদিন বাগানে হাত পড়েনি, আজও কি গাছপালাগুলিকে অবহেলা করা চলে? অথলে ম'রে যাবে যে! না, আর এখন ঘুমবার সময় নেই। অমলা জোর ক'রে সব ক্লাস্তি ঝেড় ফে'লে কাজে লেগে গেল। ঘরে ঢুকেই উৎসবের রঙে চোবান কাপড় ছেড়ে ফে'লে, শাদা একখানি শাড়ী প'রে জলের কলসীটি তুলে নিল। তরঙ্গিণী নদীর জলেই গ্রামের সকলের সব কাজ চলে, এমন কি অত বড় বাগানে জল দেবার জলও অমলা কলসী ক'রে নদী থেকে বয়ে নিয়ে আসে। নদীটা খুবই কাছে, তাই তার বিশেষ কষ্ট হয় না। অমলা কলসী নিয়ে আন্তে আন্তে নদীর ঘাটের দিকে এগিয়ে চলল।

ওমা, ঘাটের সিঁড়ির ধারে ও কে ব'সে? বসবার ভঙ্গিটা ঠিক যেন ছিদামের মেয়ে পার্বতীর মত।

## মাটির মায়া

সেই নাকি ? ভোরের আধ-আলো, আধ-অন্ধকারে ভাল ক'রে তার মুখ দেখা যাচ্ছে না, পিঠ ভরা চুলের আড়ালে শরীরও যেন ঢাকা প'ড়ে গেছে । অমলা তাড়াতাড়ি পা ফে'লে এগিয়ে চলল, পার্বতী হলে কি মজাই হয় । প্রায় বছর ঘুরে আসতে চলল, এতদিন মেয়ে কোথায় ছিল কে জানে ?

সত্যিই ত পার্বতী ! অমলা চেষ্টা ব'লে উঠল, “হ্যাঁ রে পার্বতী, কোথায় ছিলি এতদিন ? সবাইকে কি ভোগই না ভোগালি !”

মেয়েটি আশ্চর্যে আশ্চর্যে মুখ ফিরিয়ে অমলার দিকে চাইল । পার্বতীই ত বটে, কিন্তু অমলাকে যে কিছুমাত্র চিনেছে ব'লে ত বোধ হচ্ছে না ? অমলা আবার বললে, “কি রে, আমায় চিন্তে পারছিস না ? আমি যে অমলা । আট-ন'মাসের মধ্যেই ভুলে গেলি ?”

মেয়েটি দুই চোখে বিস্ময় ভ'রে অমলার দিকে চেয়ে রইল, তারপর জিজ্ঞাসা করলে, “তুমি কে ?”

অমলা খিল্ খিল্ ক'রে হেসে বললে, “আমি কে চিনিস না ? আমি তোমার দিদির সই অমলা,

## কথা-সপ্তক

আমার ঘর ঐ যে দেখা যাচ্ছে”—বলে আঙুল দিয়ে নিজের ঘর দেখিয়ে দিলে।


পূবের আকাশ লাল টক্ টক্ করছে, সূর্য উঠে পড়ল বলে। অমলা বললে, “আচ্ছা ন্যাকা মেয়ে, সত্যি বলছিস্ আমায় চিন্তে পারছিস্ না? আচ্ছা, তোর মাকে ডেকে আনি, দেখি চিনিস্ কি না। এতদিন কোথায় ছিলি?”

পার্বতী বললে, “কে জানে, মনে নেই।” অমলা এবারে সত্যিই বেশ অবাক হল। এ আবার কি রকম কাণ্ড? পার্বতী কি পাগল হয়েছে? নইলে চোদ্দ-পনেরো বছরের মেয়ে কখনও সব-কিছু ভুলে যেতে পারে? সে সকলকে খবর দেবার জন্যে জলের কলসী ভরে নিয়ে তাড়াতাড়ি গ্রামে ফিরে চলল।

দেখতে দেখতে নদীর ঘাটের কাছে ভীড় জমে গেল। সবার আগে ছুটে এল পার্বতীর মা, বাবা, ভাই-বোন সকলে। পার্বতীকে ফিরে পেয়ে কি আনন্দ তাদের। সবাই মিলে তাকে ঘিরে দাঁড়িয়ে কত প্রশ্ন যে করতে লাগল, তার ঠিকানা নেই।



## মাটির মায়া



পাক্সতী কিন্তু কোনও কথার জবাব দিল না, শুধু ফ্যাল্ ফ্যাল্  
ক'রে তাঁকিয়ে রইল।



## মাটির মায়া

পার্বতী কিন্তু কোনও কথার জবাব দিল না, শুধু ফ্যান্ ফ্যান্ ক'রে তাকিয়ে রইল। কথা ব'লে ব'লে এবং উত্তর না পেয়ে হ্যরান হয়ে শেষে পার্বতীর মা-বাবা তাকে নিয়ে বাড়ী চ'লে গেলেন। গাঁয়ের লোক এই অদ্ভুত ব্যাপারের কথা বলাবলি করতে করতে যে যার কাজে চ'লে গেল।

পার্বতী আর কোনও দিন আগেকার স্মৃতি ফিরে পেল না। তবে নিজের পরিবারের লোকদের সঙ্গে আবার সে নূতন ক'রে পরিচয় ক'রে নিল, কাজেই কাজ চলতে লাগল, কোনও অসুবিধা হল না। ক্রমে ক্রমে ব্যাপারটা সকলের সয়ে গেল।

বসন্তকাল কেটে গ্রীষ্মের দিন এসে পড়ল। আকাশ থেকে যেন আগুন ঝ'রে পড়ছে, বাইরের দিকে তাকাবারও জো নেই। তাও দেখতে দেখতে কেটে গিয়ে পৃথিবীর তৃষ্ণা মেটাবার জন্য মুষলধারে বৃষ্টি নামতে লাগল। পথ, ঘাট, মাঠ—সব জলে জলময়। তরঙ্গিণীর তরঙ্গ আরও উত্তাল হয়ে উঠতে লাগল, ক্রুদ্ধ অজগরের মত সে কেবল

## কথা-সপ্তক

ফুলে ফুলে উঠছে। গ্রামের লোক বন্যার ভয়ে কাতর, না জানি কখন কি সর্বনাশ হয়।

এমনই একটি বর্ষার সন্ধ্যায় অমলা সাবধানে পা ফেলে কলসী নিয়ে জল আনতে যাচ্ছে নদীর ঘাটে। এখনও দিনের আলো যেটুকু আছে, তারই মধ্যে কাজ সেরে তাকে ফিরে যেতে হবে, তাই যতদূর পারে তাড়াতাড়ি সে চলেছে। সন্ধ্যার অন্ধকারটা তার মনের ভিতরটাকেও যেন অঁধার ক'রে দিয়েছে।

ঘাটে সর্বদাই খেয়া নৌকা বাঁধা থাকে, ওপারের গাঁয়ের সঙ্গে এই নৌকার সাহায্যেই যোগ রাখতে হয়। অমলা দেখলে, নৌকার পাশে পা ঝুলিয়ে ব'সে একটি মেয়ে, তারই মত বয়স হবে। এমন সময় নৌকায় ব'সে মেয়েটি কি করছে জানতে অমলার একটু কৌতূহল হল, সে ডেকে জিজ্ঞাসা করল, “তুমি ওখানে কি করছ গা?” মেয়েটি বললে, “আমি শাঁখা, চুড়ি বেচতে এসেছি। ভারি সুন্দর সুন্দর চুড়ি আছে আমার কাছে, তুমি নেবে?”

“দেখি কেমন চুড়ি ?” বলে অমলা ঘাটের সিঁড়ি ক’টা নেমে নৌকার পাশে গিয়ে দাঁড়াল। অমনি সবলে এক টান দিয়ে মেয়েটি তাকে নৌকায় তুলে নিল, আর নৌকাও তরতর ক’রে চলতে আরম্ভ করল।

অমলা চীৎকার ক’রে কেঁদে উঠল, কিন্তু কেই বা তার কান্না শুন্ডে ? নৌকাটা দেখতে দেখতে মাঝ-নদীতে এসে পড়ল। ঘাটে সে-সময় আর কেউ ছিল না, কাজেই অমলার অপহরণের কথা কেউই জানতে পারল না। অমলা অবাক হয়ে দেখল, যে-মেয়েটি তাকে নৌকায় টেনে তুলেছিল, সে আর নৌকায় নেই, তার বদলে কয়েকজন অদ্ভুত চেহারার এবং অদ্ভুত পোষাক-পরা নাবিকের মত মানুষ দাঁড় টান্ছে। নৌকাটাও গেছে একেবারে বদলে। সেই শ্যাওলা-ধরা কাঠের খেয়া নৌকা আর নেই, মস্ত বড় শাদা ধবধবে জাহাজ, পাল তুলে দিয়ে বাজপাখীর মত উড়ে যাচ্ছে। কোথায় অমলাকে নিয়ে যাচ্ছে কে জানে ? ভয়ে অমলার বুক কাঁপতে লাগল, কিন্তু

## কথা-সপ্তক

কৌতূহলও কম হল না। কে এরা? কোথায় তাকে নিয়ে যাচ্ছে? কেন নিয়ে যাচ্ছে? যে লোকটা হাল ধ'রে ছিল, তার কাছে এগিয়ে গিয়ে সে জিজ্ঞাসা করল, “আমাকে তোমরা কোথায় নিয়ে যাচ্ছে?”

লোকটি বললে, “দেখতেই পাবে। তোমার ভয় পাবার কোনও কারণ নেই।” ব'লেই সে আবার নিজের কাজে মন দিল। অমলা বুঝল, সে ব্যক্তি তার আর কোনও কথা'র জবাব দেবে না, কাজেই আশ্বে আশ্বে সে নিজের জায়গায় ফিরে গেল। লোকটি তাকে যদিও আশ্বাস দিল, তবু অমলার ভয় গেল না। বাপ, মা, ভাই-বোন কেউ তার নেই, কাজেই কাউকে ছেড়ে যেতে যে তার মন কাঁদছিল তা নয়, তবু নিজের অদৃষ্টে কি না জানি আছে, তারই আশঙ্কায় তার বুকের রক্ত শুকিয়ে উঠছিল।

গভীর রাত্রি নেমে এল, জলের রং যেন কালির মত কালো হয়ে উঠল। নাবিকদের ভিতর একজন পথ দেখিয়ে অমলাকে জাহাজের একটি কামরার

## মাটির মায়া

ভিতরে নিয়ে গেল। সেটি এমন সুন্দর ক'রে সাজান যে দেখলে হৃদয় খালি চেয়ে থাকতেই ইচ্ছে করে। শাদা একটি পাথরের টেবিলের উপর খরে খরে কত রকম সুন্দর, সুগন্ধ খাবার সাজান! অমলা কিন্তু সে-সব কিছু ছুলও না। চুপ ক'রে গিয়ে বিছানায় শুয়ে পড়ল। মনে খুব উদ্বেগ থাকা সত্ত্বেও খানিক পরে সে ঘুমিয়ে পড়ল।


তার ঘুম যখন ভাঙল, তখন ভোর হয়ে এসেছে। ভাড়াভাড়ি উঠে ব'সে সে জানালা দিয়ে বাইরে চেয়ে দেখল। এ কি, তারা কি সমুদ্রে এসে পড়েছে না কি? চারিদিকে থৈ থৈ করছে নীল জল, ডাঙ্গার চিহ্নও দেখা যায় না। অমলা বিছানা ছেড়ে বাইরে ছুটে গেল। না, সমুদ্রে নয় বটে, তবে তারই কাছাকাছি,—প্রকাণ্ড এক নদী। তাদের গ্রামের তরঙ্গিণী নদীকে তারা বড় ব'লে জানত, এর কাছে সেটা ত নর্দমার মত। দূরে, অনেক দূরে, আকাশের কোলে নীল রেখার মত গাছের সারি যেন দেখা যাচ্ছে। তাহলে এখানেই যাচ্ছে তারা? ওটা কাদের দেশ?

## কথা-সপ্তক

নাবিকরা আবার অমলাকে খাওয়াবার চেষ্টা করল, অমলা কিন্তু দু-এক-টুকরা ফল ছাড়া আর কিছু ছুলও না। বার বার ক'রে তাদের জিজ্ঞাসা করতে লাগল, “আমাকে কোথায় নিয়ে যাচ্ছ, কেন নিয়ে যাচ্ছ?” কিন্তু উত্তর কিছুই পেল না।

বর্ষার সকালের মেঘলা কেটে গিয়ে, এক ঝলক রোদ নদীর জলের উপর এসে পড়ল। জলটা ঠিক ইম্পাতের খাঁড়ার মত বাকমক করতে লাগল, স্লেদিকে তাকালে চোখ ঠিকরে যায়। দূরের সেই গাছের সার ক্রমে স্পষ্ট হয়ে উঠছে, জাহাজটা স্লেদিকেই চলেছে। ক্রমে প্রাসাদের ছাদ, মন্দিরের চূড়া, পাহাড়ের মাথা এক-এক ক'রে দিগন্তের গায়ে ফুটে উঠতে লাগল। অমলারা প্রকাণ্ড এক নগরের দিকে এগিয়ে চলেছে। দেখতে দেখতে জাহাজ এসে বন্দরে ভিড়ে গেল। সেখানে হাজার হাজার লোক জমা হয়েছে, হাতী, ঘোড়া, রথ, চতুর্দোলা কত কি নিয়ে। পোষাক তাদের হাজার রঙে রঙীন, ধরণটা নূতন। এ ধরণের পোষাক অমলা আগে কখনও দেখেনি। দেশটাও





অমলার সামনে বাকুটা নামিয়ে সে ডালাটা তুলে ধরল



অদ্ভুত সুন্দর, ঠিক যেন স্বপ্নের দেশ, নয় ত উপ-  
কথার দেশ। সব জিনিষই চেনা চেনা লাগে  
অথচ ঠিক চেনা নয়। সাধারণ জিনিষকে  
নিপুণ চিত্রকরের অঁকা রঙীন ছবিতে যেমন  
অসাধারণ দেখায়, এ যেন সেই রকমেরই। অমলা  
হাঁ করে এই অপূর্ব দেশের দিকে চেয়ে রইল।

ছোট একটা নৌকায় চড়ে একজন মানুষ  
জাহাজে এসে উঠল, তার সঙ্গে সাদা রঙের একটা  
সিন্ধুক, সেটা হাতীর দাঁতের কি পাথরের, তা কে  
জানে? অমলার সামনে বাস্কাটি নামিয়ে সে ডালটা  
তুলে ধরল। ভিতরে একটি পোষাক, আর কতক-  
গুলি গহনা। সে শাড়ীর আর গহনার রূপ দেখে  
অমলার চোখে ধাঁধা লেগে গেল। এটা কাদের  
দেশ? সত্যিই কি অমলা উপকথার দেশে এসে  
পড়েছে? এত সুন্দর জিনিষ সত্যিকার জগতে  
কি থাকে?

লোকটি বললে, “আপনি পোষাক বদলে নিন,  
মহারাজ তীরে অপেক্ষা করছেন।”

অমলা অবাক হয়ে বললে, “মহারাজ কেন

## কথা-সংকলন

আমার জন্মে অপেক্ষা করছেন ? আর আমি এত দামী সব জিনিষ তোমাদের কাছ থেকে নেব কেন ? আমি ত তোমাদের চিনি না ?”

লোকটি বললে, “আপনি আমাদের মহারানী হবেন। রাজ্যে যত ধনরত্ন আছে, সবই ত আপনার।”

অমলা এতই অবাক হয়ে গেল যে, তার মুখে কোনও উত্তর জোগাল না। কোথাকার পাড়া-গাঁয়ের গরীব মা-বাপ-ছারা মেয়ে সে, সে হবে কিনা এই আশ্চর্য্য সুন্দর দেশের রানী ? এ যে শুনলেও বিশ্বাস হয় না। অমলা কি স্বপ্ন দেখছে, না জেগে আছে ? নিজেকে খুব জোরে চিমটি কেটে, চোখ দুটো খুব ভাল করে ঘ’ষেও অমলা কিন্তু এই স্বপ্নটা ভাঙতে পারল না। অগত্যা তাকে স্বীকার করতে হল যে সে জেগেই আছে।

তীরের লোক-লস্কর ক্রমেই অধৈর্য্য হয়ে উঠছে বোঝা গেল। অমলার আর দেরি করতে সাহস হল না। সে শাড়ী, জামা আর গহনা নিয়ে তাড়াতাড়ি কামরার ভিতর ঢুকে গেল, পোষাক

বদলাতে । নূতন সাজে সেজে সে যখন দেওয়ালে টাঙান বড় আয়নাটার দিকে তাকাল, তখন আর নিজের আগের চেহারা খুঁজে পেল না । সেও যেন এর মধ্যে এ দেশের মানুষগুলির মত হয়ে গেছে । মনটা তার কেমন যেন একটা অদ্ভুতভাবে ভ'রে উঠল ।

অমলা বাইরে এসে দাঁড়াতেই, তীরের লোকেরা জয়ধ্বনি ক'রে উঠল । মস্ত বড় সোনার রথ ভীড়ের ভিতর থেকে বেরিয়ে এসে সামনে দাঁড়াল । জাহাজ থেকে তীরে নামবার জন্য হড়্‌হড়্‌ করে সিঁড়ি নেমে গেল । নাবিকেরা তার উপর পেতে দিলে লাল মখমলের আস্তরণ । অমলা আস্তে আস্তে তার উপর দিয়ে হেঁটে গিয়ে সোনার রথে উঠে পড়ল । সমুদ্রের ফেনার মত শাদা ঘোড়া চারটে এতক্ষণ অসহিষ্ণুভাবে মাটিতে পা ঠুকছিল । তারা এইবার ছুটে চলল বাতাসের আগে আগে, পিছন পিছন চলল আরও যত সব রথ, ঘোড়া, হাতী আর মানুষের দল ।

• রথ গিয়ে থামল মস্ত এক প্রাসাদের সামনে ।

## কথা-সপ্তক

শাদা আর রঙীন পাথর মিলিয়ে প্রাসাদটি গড়া, তার আনাচে-কানাচে সোনা-রূপো-মণি-মুক্তার ছড়াছড়ি। পথ-ঘাট সব রূপোর, গাছপাতা-ফুল-ফল এমন ঝক্‌মক্‌ করছে যে সেগুলিও যে মণি-মাণিক্য দিয়ে গড়া, তা বুঝতে দেরি হয় না। প্রাসাদের সিংহদ্বার দিয়ে ঢুকে, রথ এসে দাঁড়াল প্রকাণ্ড এক মর্ম্মর-পাথরের সিঁড়ির সারির সামনে। সেইখানে এই দেশের রাজা দাঁড়িয়ে আছেন— তাঁর নূতন রাণীকে অভ্যর্থনা করবার জন্যে।

অমলা মহারাজের দিকে চেয়ে দেখলে। এখানের সবই সুন্দর, মহারাজ যেন সব চেয়ে সুন্দর। মাথায় তাঁর হীরার মুকুট, হাতে হীরার রাজদণ্ড। সিঁড়ি বেয়ে নেমে এসে তিনি অমলাকে হাত ধরে রথ থেকে নামিয়ে নিলেন।

ছু'জনে মিলে প্রাসাদের ভিতর ঢুকে সব ঘর-গুলি আর তার আশ্চর্য্য সুন্দর গৃহসজ্জাগুলি দে'খে দে'খে বেড়াতে লাগলেন। মহারাজ জিজ্ঞাসা করলেন, “অমলা, তোমার ঘর পছন্দ হয়েছে? এই বাড়ীতে থাকতে ভাল লাগবে?”

## মাতির মায়া

অমলা বললে, “বাড়ীটা ত খুব সুন্দর, তবে এখানে থাকতে ভাল লাগবে কিনা জানি না।”

মহারাজের সুন্দর মুখ গম্ভীর হয়ে উঠল, তিনি অমলাকে প্রাসাদের আর-এক দিকে নিয়ে চললেন। এটা তাঁদের ধনাগার, এখানে রেশম, কিংখাব, মখমলের ছড়াছড়ি, মণি-মুক্তা-হীরা চারিদিকে গড়াচ্ছে। পৃথিবীর মানুষ যত ঐশ্বর্য্য যে কোনও সময় কল্পনায় এনেছে, সব এখানে দেখা যায়।

মহারাজ বললেন, “অমলা, এসব তোমার হবে। এত ধনরত্ন পেয়েও কি তুমি খুসি নও?”

অমলা বললে, “এগুলি দেখতে খুবই সুন্দর লাগে, কিন্তু এগুলি আমার হবে মনে ক’রে কিছু বেশী আনন্দ হচ্ছে না।”

মহারাজ আরও গম্ভীর হয়ে গেলেন। তারপর অমলাকে প্রাসাদের অন্যদিকের আর-একটি ঘরে নিয়ে গিয়ে বসালেন। বললেন, “তুমি এখানে এখন থাক। ঐ রূপোর ঘণ্টাটি বাজালেই দাস-দাসীরা এসে তোমার হুকুম পালন করবে। আমি কাল আবার তোমার সঙ্গে দেখা করতে আসব।

## কথা-সংকলন

প্রাসাদটা আরও ভাল করে দেখ, তাহলে হয়ত এখানে থাকতে তোমার ইচ্ছা করবে।”

অমলা বললে, “যাবার আগে আমায় বলে যান, আমায় কেন এরকম করে ধরে আনা হল!”

মহারাজ বললেন, “আমার রাণী হবার জন্যে। এ দেশের নাম কল্পরাজ্য, এখানের রাজা রাণী সব বাইরের থেকে নিয়ে আসতে হয়। লোকজন যাদের এখানে দেখে, সবই অন্য জায়গা থেকে এসেছে, এখানে কারও জন্ম হয়নি। এখানে এসে খুসি মনে থাকতে হয়, না হলে এ রাজ্যে থাকবার নিয়ম নেই। যে দেশ ছেড়ে আসবে, সেখানের কোনও কিছুর জন্যে যদি মনে দুঃখ হয়, তা হলে তখনই যেখানকার মানুষ, সেখানে ফিরে যাবে।”

অমলা জিজ্ঞাসা করল, “পার্বতীকে কি তোমরাই ধরে এনেছিলে?”

মহারাজ বললেন, “হ্যাঁ। কিন্তু অনেক দিন এখানে থেকেও তার মন বসল না, খালি মা, বাবা, ভাই-বোনের জন্যে সে কাঁদত, তাই তাকে ফিরে পাঠিয়ে দিয়েছি।”



অমলা জিজ্ঞাসা করল, “সে কিছু মনে করতে পারে না কেন ?”

মহারাজ বললেন, “আমরা যাকে ফিরিয়ে পাঠাই, তার স্মৃতি কেড়ে নিই, নইলে আমাদের এই গুপ্ত-রাজ্যের পথ সবাই জেনে নেবে যে ?”

মহারাজ চ’লে গেলেন। সারাদিন ধ’রে ঘুরে ঘুরে অমলা এই অতি আশ্চর্য্য প্রাসাদের সব ঘর দেখতে লাগল। যত দেখে, তত তার বিস্ময় বেড়ে যায়। দাস-দাসীরা তার হুকুম পালনের জন্য চারিদিকে ঘুরছে, কিন্তু অমলা কি হুকুম দেবে ভেবে পায় না। চারিধারের ঐশ্বর্য্য দেখে তার চোখ যত মুগ্ধ হচ্ছে, মন তত ভার হয়ে আসছে। কোনও কিছুতেই যেন আনন্দ নেই, কোনও জিনিষকেই নিজের ব’লে মনে হয় না। সন্ধ্যার সময় ঘরে ঘরে মাটির প্রদীপ জ্ব’লে উঠল, অমলা তখন স্নান মুখে শোবার ঘরে গিয়ে শুয়ে পড়ল। এত আলোর ঝকঝকানি তার আর ভাল লাগছিল না।

পরদিন ভোর হতেই নহবতের বাজনার সঙ্গে

## কথা-সপ্তক

সঙ্গে মহারাজের রথ এসে প্রাসাদের সামনে দাঁড়াল। শাদা-পাথরের সিঁড়ি বেয়ে উঠে, হীরার মুকুট পরা মহারাজ অমলাকে জিজ্ঞাসা করলেন, “কি অমলা, আজ কেমন লাগছে এ দেশটা?”

অমলা স্নান মুখে বললে, “আগেরই মত।”

মহারাজ বললেন, “তোমার বাপ নেই, মা-ভাই-বোন কেউ নেই, তুমি গরীব অনাথিনী মেয়ে। কিসের টানে আবার সেই দারিদ্র্যের মধ্যে ফিরে যেতে চাও?”

অমলা বললে, “মহারাজ, আমি আমার সেই বাগানের মধ্যে কুটিরখানি কিছুতেই ভুলতে পারছি না। সেই ঝুম্‌কো লতার বেড়া, সেই বকুল-টগর-করবীর গাছ, সেই মাধবীলতার কুঞ্জ, বর্ষার জল প্রথম পৃথিবীর বুকে পড়লে যে স্রগন্ধ বেরিয়ে আসে মাটির বুকের থেকে, তা যেন আমাকে ডাকছে। আমাদের তরঙ্গিণী নদীর ঢেউগুলি আমায় ডাকছে। মাটির মায়া আমি ছাড়তে পারব না, আমি ফিরে যেতে চাই।”

রাগে মহারাজের মুখ কালো হয়ে উঠল, যেন

ঝড়ের মেঘের মত । হাতের হীরার দণ্ড অমলার কপালে ছুঁইয়ে বললেন, “ফিরে যাও নির্বোধ মেয়ে । এখানের সব স্মৃতি তোমার মন থেকে মুছে যাক্ ।”

অমলা ভয় পেয়ে কেঁদে উঠল । হাত জোড় ক’রে বললে, “দোহাই মহারাজ, এমন শাস্তি আমায় দেবেন না । পার্বতীর মত জড়-বুদ্ধিহীন হয়ে আমি বাঁচতে পারব না । আমার মা, বাবা, ভাই-বোন, সবাই আমায় ছেড়ে গেছে, কিন্তু আমার স্মৃতিতে তারা বেঁচে আছে । আমার ছেলেবেলাকার সুন্দর দিন-গুলি, আকাশের কত রং, আমার বাগানের কুটীরের কত ছবি, সব আমার মন জুড়ে আছে । সব গেলে, আমার বেঁচে কি হবে ?”

মহারাজ বললেন, “আচ্ছা, তুমি নির্বোধ হলেও, স্বভাব ভাল । তোমায় আমি বেশী কঠিন শাস্তি দেব না । এখানকারই স্মৃতি শুধু তোমার মন থেকে মুছে যাবে, আর আগেকার সব কথা মনে থাকবে । পার্বতী বড় লোভী, তাই তার

## কথা-সপ্তক

শান্তিও বেশী। সে লুকিয়ে এখানকার বাছা বাছা মণিমুক্তা নিয়ে যাচ্ছিল।”

অমলা মহারাজকে প্রণাম ক’রে বললে, “বিদায়, মহারাজ! এখানকার আর সব ভুলব ব’লে দুঃখ হচ্ছে না, আপনার দয়ার কথা ভুলব এই আমার দুঃখ”—বলতে বলতে কল্পরাজ্য যেন হাওয়ায় মিলিয়ে গেল।

অমলা যেন ঘুম থেকে জেগে উঠল। ভাবলে, “মা গো মা, আমার হয়েছে কি? অন্ধকার হয়ে এল, আর আমি এই ভর-সন্ধ্যায় নদীর ঘাটে ব’সে তুলছি? এখন পথ দেখে বাড়ীফিরে যেতে পারলে হয়!”

তাড়াতাড়ি এক কলসী জল তুলে নিয়ে অমলা হন্ হন্ ক’রে বাড়ীর দিকে চলতে লাগল।

মহাপূজার সর্বোৎকৃষ্ট উপহার পুস্তক

যুক্ত যোগীন্দ্রনাথ সরকার মহাশয় সম্পাদিত

সচিত্র—সর্বাক্ষুন্দর—সম্পূর্ণ

সপ্তকাণ্ড রামায়ণ

৫৮ খানি উৎকৃষ্ট রঙিন ও একরঙা চিত্রে সুরঞ্জিত—মূল্য ৩ টাকা।

স্ববীন্দ্রনাথ বলেন—“কৃত্তিবাসের রামায়ণ যদি বাঙ্গালী  
ছেলেমেয়েরা না পড়ে, তবে তার চেয়ে শোচনীয় অশিক্ষা  
তাদের পক্ষে আর কিছু হতে পারে না। সেই পড়বার  
পথ যোগীন্দ্র বাবু মনোরম করেছেন—এটি একটি সংকীর্ণ।”

যোগীন্দ্র বাবুর এই বইগুলি উপহারের পক্ষে সর্বশ্রেষ্ঠ

ছোটদের রামায়ণ— ( ১৫শ সং ) মূল্য ১০ আনা

ছোটদের মহাভারত— ( ১২শ সং ) মূল্য ১ টাকা

ছোটদের চিড়িয়াখানা—( ২য় সং ) মূল্য ১ টাকা

জানোয়ারের কাণ্ড— ( ২য় সং ) মূল্য ১ টাকা

পাণ্ডপক্ষী— ( ৪র্থ সং ) মূল্য ২০ আনা

বনে জঙ্গলে— ( ৩য় সং ) মূল্য ২ টাকা

শিশুপাঠ্য গ্রন্থাবলী—মূল্য ৫ টাকা

শ্রীযুক্ত খগেন্দ্রনাথ মিত্রের

## সুন্দরবনের পথে

বহু-চিত্র-সম্বলিত—মূল্য ৫০ আনা

বাঙ্গালা ভাষায় এই ধরনের পুস্তক আর নাই।  
স্বায়ককে কত গ্রাম ও জনহীন প্রান্তরের মধ্য দিয়া  
স্বাপদসঙ্কুল সুন্দরবনের পথে অসীম সাহসে, অপূর্ব  
কৌশলে অগ্রসর হইতে হইয়াছিল—হিংস্রজন্তু, দুর্দ্বন্দ্ব  
ডাকাত, ভয়ঙ্কর ঝড় ও বান, কিছুই তাহার গতিরোধ  
করিতে পারে নাই—এই লোমহর্ষক বৃত্তান্ত পাঠককে  
মোমাঞ্চিত করিবে।

শ্রীযুক্ত খগেন্দ্রনাথ মিত্রের

## ব্রেজি-লর বন

বহু চিত্র সম্বলিত—মূল্য—৫০ আনা

নানা অদ্ভুত জলজন্তু ও মৎস্য-পরিপূর্ণ পৃথিবীর  
দীর্ঘতম নদী আমেজন দিয়া বহুমূল্য কাষ্ঠের সন্ধানে  
যাত্রা করিয়া এক বণিককে কিরূপে নৃশংস জংলীদের  
কবলে পতিত হইতে হয় এবং কি কোশলে মুক্ত  
হইয়া পলায়নকালে দুর্ভেদ্য বনপথে প্রতিপদে মৃত্যুর  
সম্মুখীন হইতে হয়—ইহাতে তাহা অতি চমকপ্রদভাবে  
বর্ণিত হইয়াছে।











